


BONZAMBE ELIMBOLAMI

 Matondi, Ndeko Carlson. Pe mbote na bino nyonso, bandeko mibali pe basi kati na Nkolo. Ezali. . . Ntango mosusu, natatabanaka mwa moke mpo na komata awa, ntango nayokaka matatoli ya kitoko boye, pe nyonso wana, ndenge nasali na ntongo oyo. Pe, na bongo, mwana mboka oyo azali komona mpasi pe konyokwama, lokola oyo bandeko na biso ya Batiste, ya mobali pe ya mwasi, baleki na yango; lokola ngai moko na—nazaláká Batiste, ntoma ya lingomba Batiste, pe—pe nayebi ndenge esalaka soki bandeko na yo. . .

² Likambo yango pe ekómelaki ngai. Bandeko na ngai moko babwakaki ngai libanda, pe bazuaki likanisi ya kolongola ngai mpo nakómaki elema. Pe nasosolaki, pe nalobaka yango na elobeli moko ya kobombama: “Soki nazali elema, botika ngai kimia, mpo nazali na esengo ndenge nazali boye koleka ntango motó na ngai ezalaki kosala malamú.” Boye, oyo wana ezali filozofi moke ya ngai moko, oyo nazalaka na yango. Pe—pe nakóma mpenza kosepela bandá na—nakóma boye.

³ Pe ndeko na biso ya Eglise de Christ ya awa, ndenge tobengaka yango, to ya Campbellite. Pe nazali komikanisela ete bazaláká kobundisa mayangani na makasi nyonso, ntango tobandáká. Kasi, boyebi, biso pe tozaláká na moko, nkombo na ye Polo, ye pe azaláká bongo, pe akómaki moko na biso. Bongo, ya solo. Nakanisi ete eloko oyo balukaka mingi, ezali nde bomoi oyo ozali kobikela. Boyebi, mpo na ngai, malamú obikela liteya na esika oteya ngai yango ntango nyonso.

⁴ Eleki mwa ntango, motei moko ya lokumu, mobali moko malamú ya Plein Evangile; bino—bino nyonso boyebi ye, nabanzi. Ezali Reverend Booth—Clibborn; ateyaka Nsango Malamú na minoko nsambo oyo ekeseni. Azali mpenza na mayele mingi. Pe ngai. . . Azali na mayele mingi ya bóngo. Pe mokolo moko, tosalaki mobembo elongo, ná ye ná Ndeko Moore ná ngai, pe tosalaki kosolola likolo na likambo moko. Pe likanisi na ngai ekeseneki na oyo ya ye, abalolaki miso epai na ngai. Alobaki: “Oyebi mpenza Biblia na yo te.” Boyebi ndenge Ndeko Booth akoki koloba yango.

⁵ Nalobaki: “Ya solo, Ndeko Booth, kasi nayebi Mokomi na yango malamú mpenza.” Bongo, bongo na—nalingi. . . Boyebi, ezali te koyeba Liloba na Ye nde ezali Bomoi, kasi “koyeba Ye ezali Bomoi.” Ya solo. Bomoni? Náyeba Liloba na Ye to te; soki bobele nayebi nde Ye! Pe yango ezali mpenza Solo.

⁶ Na ntongo ya lelo, nazalaki kopesa mbote ya loboko na lisanga kitoko ya batei awa. Pe moto oyo afandaki wana, ezalaki nde. . . Nalingi kokumisa moto moko te. Kasi mobali

oyo ya moindo akotaki, ndeko oyo, afandaki wana. Nalobaki na sekretère na ngai oyo: “Oyo wana nde Moklisto ya solosolo.”

⁷ Soki namoni yo, nakanisaka mingi Mpaka Smith, oyo azalaki na Eglise de Dieu en Christ, nabanzi. Nazalaki koteya mingi epai na bango kuna, pe—pe nazali komona ye kino lelo. Akokanaki mwa moke na ndeko oyo, bobele ete ye azalaki na mwa moustache ya pembe. Nazalaki kokota na ekuke ya nsima, pe nabosanaka te maloba mobange wana azaláká koloba; soki otomboli miso, basantu nyonso bazalaki koyemba, boyebi; Pe elenge mwasi moko azalaki kofanda na litúmu. Loyembo oyo nazalaki kolinga mingi ezali *Netola Ye*. Pe bango nyonso bazalaki kobeta maboko, lokola ba-pantekotiste, boyebi, *Netola Ye*. Bazalaki kolinga ngai, ngai pe nazalaki kolinga bango. Pe ntango tozalaki kokota. . .Ye azalaki kofanda kuna, azalaki kotia motó na ye *boye*, likolo na mesa, pe azalaki kaka kotala bango, boyebi. Azalaki koloba: “Kota, mpaka. Pemisa enkoti na yo. Pemisa enkoti na yo.”

⁸ Ndeko mobali oyo; pe nayoki, na bongo, ete moko na bayembi nzembo na Nzambe oyo nalingaka mingi, azali mwasi na ye. Pe nasali nyonso oyo nakokaki kosala, mpo ayemba. Pe, na bongo, asengaki ete babengisa ye te, pe nayebi oyo yango elingi koloba. Kasi ngai moko nakobengisa ye, soki akoki, koya koyemba.

⁹ Ee, yo nde ndeko mwasi oyo ayembaki—ayembaki loyembo ya, *Kuna Na Masuwa*, mokolo moko na ntongo, epai ya Baklisto Bato na Mombongo? [Ndeko mwasi alobi: “Iyo, misie. Iyo.”—N.D.E.] Nabanzi mwasi na ngai akoya na mposho oyo, pe mposa na ngai ezali ete áyoka yo, mpo nakumisi yo pe mingi. Pe soki bozangi yango, na bande, tokobongisa likambo yango. Nalingaka ba-nzembo kitoko wana.

¹⁰ Pe, nazaláká koyebisa bato, na—nazalaki kokoka koyemba te. Hólalá, nayebaki koyemba ata moke te. Kasi nazalaki koloba: “Soki okómi na Lola pe obandi kofanda na ndako na yo ya monene pe kitoko, oyebi, na Likolo,” nazalaki koloba, “mosika, na nse ya ngomba, kuna na zamba, mwa ndako moko ezali kuna. Ekozala nde oyo ya ngai. Pe mokolo moko na ntongo, ntango okobima na mbalasan pe oyoki moto moko ateleme kuna, azali koyemba: ‘Ngolu ya kokamwa! oyo mongongo na kitoko, ebikisi moto na mawa lokola ngai!’ Yo loba: ‘Nkembo na Nzambe! Sukasuka moto ya mpiko Ndeko Branham alongi.’” Ekozala ngai kuna nde bokoyoka, komeka koyemba.

¹¹ Epai ya bandeko na ngai Baklisto, pe epai. . .Nabanzi ete ndeko mobali moko atalisaki biso ye, na ntongo oyo, ete azali motei na losambo ya Buddha, awa. Mbote na yo, moninga na ngai ya motuya. Pe nasolólá mingi, kasi mingi koleka te, na bato ya Buddha; mpenza-mpenza na Canada, kati na ba-Chinwá, pe namonaki ete bazali mpenza na bolingo pe boboto.

¹² Nazali komikanisela elenge mobali moko ya losambo ya Buddha, ya tempelo ya Buddha, ayaki na liyangani ya Winnipeg, pe azalaki mokufi miso. Bazali bato ya nzoto mike mpenza, ya boboto mingi, pe na ntembe te bandimaka ete Nzambe azali mobikisi na bokono. Pe ntango nazalaki kobondela mpo na ye, azalaki koloba mbala na mbala ndenge alingi Nzambe, pe na mbala moko miso na ye efungwanaki, kati na . . . Pe ezalaki likambo ya ki—kitoko mingi. Boye, to—tosepelaka na moto nyonso pe na bato nyonso.

¹³ Sikawa, nazuá naino libaku ya boye te liboso, na Chicago, komeka koteya . . . Kútu, nakomeka ata moke te koteya mateya mosusu, mpo batei oyo bazali awa baleki ngai mosika, mpo na koteya. Kasi, sima na manso, boyei awa te koyoka mateya. Kasi nakanisaki ete ekozala ntango malamú koleka ete nakutana na batei ya Chicago, ya etuka oyo, mpo náyeba bango malamú, pe mpo tóyebana malamú. Pe natondi mpenza Nkolo mpo na libaku oyo. Mpamba te, nasila koya na engumba oyo mbala mingi, nasungamaki na lingomba moko mpamba, nasungamaki pe na Baklisto Bato na Mombongo; yango wana, nazuaki libaku ata moko te ya koloba na lisanga ya bandeko.

¹⁴ Na—na nsima nakanisaki, pe makambo mingi elandaka mosala ya koteya lokola oyo, makambo na yango nyonso, malamú ná mabe, na lolenge ete mbala mosusu ekómaka pete ete moto ázua likanisi ya mabe mpo na yango. Nde nalingi kozua mwa miniti oyo ezali kolanda mpo námeke kolimbola pe—pe kotalisa yango polele epai na bandeko na ngai, polele mpenza na ndenge ekoki.

¹⁵ Pe na—nakoki te pe nazangi makoki ya koloba ma—maloba oyo ekoki ntango mosusu kozala na mwa ntina epai na bato oyo batángá. Ngai natángá te, pe nazángá kotángá. Kasi nazalaki . . . nalingi Nkolo. Pe, mbala mosusu, Nkolo apésá ngai nzela mosusu ya kozua milimo, na nzela na likabo ya Nzambe, mpo ézipa libulu ya eloko oyo baboti na ngai bazangaki makoki ya kopesa ngai, kotángá. Nabotami na libota moko ya babola, ya bana zomi, ná tata moko ya kobela-bela, pe nazuaki libaku ya kotanga te. Na bongo, ntango nabotamaki, likambo moko esalemaki, kobikela elongo na Nzambe, mpo na mama pe tata na ngai. Pe bosila kotanga lisolo na ngai. Pe, na nzela na yango, nazali komeka kosala na ngambo na ngai, elongo na bino bandeko, mpo na kobenda basumuki epai na Klisto. Pe sikawa ngai . . .

¹⁶ Nazali moto na soloka te. Kasi ntango nyonso, liboso ya kofungola Liloba, nalingaka kosolola mwa moke na Mokomi na Yango. Boye, tokoki lisusu kogumba motó mwa moke.

¹⁷ Tata na biso ya motuya, Yo nde Nzambe na biso, pe toyei epai na Yo mpo na Nsamgo Malamú. Ngai oyo liboso ya bana na Yo, ya bakengeli na Yo, pe ya bandeko oyo bazali na kondima ya motuya lokola oyo ya ngai. Pe, motema na ngai etondi na esengo

ya koyoka mibali oyo basosolamaki mabe, pe batindaki bango na ba-lopitalo ya bato na maboma, na ntina na Bokonzi na Nzambe; komona ndenge Ozali kobenga bana na Yo na ntango na suka.

¹⁸ Pe tondimi solo, Tata, ete tozali kobika na suka ya mommekano. Ndenge mosakoli alobaki: “Pole ekozala na ntango na mpokwa.” Pe tondimi lelo ete tozali bamemi ya Pole monene ya Nsango Malamu oyo, na ngolu na Yo, Opesi biso nzela ya komema yango kino na suka ya mokili, epai kolamuka oyo ekómi.

¹⁹ Pe nabondeli, Tata, ete, na ntongo oyo, Ópesa ngai nzela ya koyebisa bandeko na ngai, uta na motema na ngai, mposa pe ntina ya bomoi na ngai mpo na Yo, mpo bakoka kososola. Kokisa yango, mpo tokoka kozala na bolingo ebongi be, bondeko, pe boyokani, na mosala mobimba ya Nsango Malamu. Mpo tosengi yango na Nkombo na Yesu, Oyo abondelaki ete tózala moko, lokola Ye na Tata na Ye bazalaki Moko. Tondimi yango, ete: “Na yango nde bato nyonso bakoyeba ete bozali bayekoli na Ngai, soki bozali na bolingo kati na bino.” Amen.

²⁰ Sikawa, kaka . . . Nazali kolikia pe natii motema ete nazali kotungisa bino te, bandeko mibali pe basi, na likambo oyo. Kasi nakanisi ete nakosepela koloba polele, mpo bóyoka te oyo moto mosusu alobi. Pe nalimbolaki, mbala mingi, na mayangani mosusu ya batei, kasi oyo nde mbala na ngai ya liboso mpo na etonga ya Chicago, pe nakosepela ete bóyeba ngai malamumpenza, na oyo nazali komeka kosala.

²¹ Kati na Nsango Malamu ya kala oyo epambolami, na mokapo ya 26 na Mokanda ya Misala, totangi:

*Na boye, mokonzi Agilipa, naboyaki kotosa emononeli
na likolo te:*

²² Oyo, na ntembe te, Polo moto azali koloba. Kútu, biso nyonso, lokola batei, tolingaka kozua ye lokola ndakisa, mpo ye. . . Bisu, na motema moko, tondimi ete azali ntoma oyo atindamaki na lingomba ya Mabota, ete Nzambe abengaki ye mpo ázala mo—motatoli epai na Mabota. Pe mosala na ye ya koteya, bato batielaki yango ntembe.

²³ Pe na momesano, soki eloko moko oyo ezali libanda na momesano esalemi, bato batielaka yango ntembe. Ezalaka, pe nakanisi ete ezalaka kaka bongo; bato basengeli kotiela yango ntembe. Pe nakanisi ete, mbala na mbala, bakengeli bakebaka mingi na ma—makambo oyo bayokaka, pe nakanisi ete ezali na ntina. Mpamba te, soki nasosoli ndimbola ya *mokengeli*, elingi koloba “mobateli ya mpate.” Pe, yango wana, azali mo—mo—moleisi, to mobateli, ya mibali ná basi oyo Molimo Mosantu atii ye lokola sinzili. Pe asengeli koyeba lolenge ya bilei oyo ba-mpate na ye bazali kozua, pe esika ezali kouta. Nakanisi ete asengeli kosala bongo.

24 Pe soki mokengeli, to mbala mosusu ata moto mosusu, amonani lokola na mwa bokebi, yango, esengelaki kotungisa moto ata moke te. Esengelaki bobele kopesa limemia na motema ya moto, mpo na moto oyo azui ngambo wana, oyo atieli yango ntembe. Pe, kútu, soki oyebi malamau te ete ozali na alima, ekosalema ndenge nini ete mokolo moko ótambola na kondima?

25 Soki otii na makanisi na yo. . . Nzoka nde, yango ezali lokola psikoloji; ekoki pe kozala yango, pe ezali yango, kasi ezali mabe te. Kasi soki mpenza, na motema na yo, soki okanisi ete okotelema mokolo moko te mpo na kokende mosika na mesa, ekoki pe kosalema ete okotelema te. Omoni? Osengeli. . . Ezali kaka pete ndenge wana.

26 Osengeli kondima. Osengeli kozala na kondima. Osengeli kotia motema. Pe ndenge nini okoki kotia motema na eloko moko soki o—soki oyebi ata esika ozali kokende te? Ndenge nini nakoki kotambwisa motuka na nzela oyo nakóma naino te, na mbangu mingi, pe etondi na bisika ya kokatisa, wana nayebi te eloko oyo ebombami na esika ya kokatisa oyo elandi? Osengeli komona esika ozali kokende, soki te okoyeba ndenge ya kotambola te. Pe moto nyonso asengeli kozala nde bongo. Pe na ntango wana, ntango okoki, omoni yango, emonisameli yo, pe oyebi esika ozali kokende, na ntango wana eloko moko te ekopekisa yo.

27 Pe yango nde, nakanisi, Polo, likambo oyo azali koluka ete Agilipa ásosola awa. Oyo wana, a—ayebisaki bango ete, “Kala, nazalaki moko na bino.”

28 Pe nabanzi, ntango mosusu, soki—soki ndeko mobali mo-Batiste oyo, soki akokaki kokende na lingomba Batiste na ntongo oyo, ye na mwasi na ye, elingaki kozala ntango mosusu litatoli na bango. “Na—nazalaki kala moko na bino.”

29 To ndeko ya Eglise de Christ, to oyo—oyo ya ba-Campbellite oyo, soki akei epai ya—ya bato na ye. Nabanzi ezali na nkombo ya mwa malamau; babengaka yango Bayekoli na Klisto, kasi na bosembo, bandimaka nde malakisi ya Alexander Campbell. Na nsima, Eglise de Christ babimaki kati na bino, na ntina na miziki. Ya solo, boye te? Pe soki akokaki kozonga epai na bango, alingaki koloba: “Nazalaki kala moko na bino.”

30 Pe Polo akei kuna, epai ya Mokonzi Agilipa, ná Festus, pe alobaki: “Nazalaki kala moko na bino. Nazalaki Mofalisai ya Bafalisai.” Ayekoláká epai ya Gamaliele, molakisi monene, pe ayebaki mibeko pe mitindo na bango nyonso, makambo mpenza oyo bazalaki kondima ná oyo bazalaki kondima te. Pe alobaki: “Nanyokolaki ata Lingomba ya Nzambe kino koboma.” Bomoni? Alobaki: “Kaka likambo oyo bazali kotiela ngai ntembe, nanyokolaki yango.”

31 Pe nakanisaka ntango nyonso ete liwa ya Etiene etungisaki Polo mingi mpo, na ntango yango, amonaki nkembo oyo ezalaki na elongi ya Etiene. Ntango atombolaki miso, wana mabanga

ezalaki kobeta ye pene na liwa, pe alobaki: “Namoni Yesu atelemi na loboko ya mobali ya Nzambe.” Pe boyebi, bokoki koboma motindami, kasi bokoki soko moke te koboma nsango na ye. Ezali Solo. Pe nsango yango, ata Etiene akendeki kokutana na Yesu, ata bongo, nsango na ye ekobaki, mpo Polo akobaki kolobela yango, pe, ete, azalaki “moke koleka” kati na bango, kasi abongaki te kotangama moko na bango, mpo azalaki nzekeneke pe—pe andimaki báboma mosantu oyo.

³² Pe yango wana, Polo, ndenge bato nyonso basengelaki kosala liboso na bato, Polo azongisaki lo—lobiko na ye, na ebandeli, na oyo azalaki; na nsima atii yango pe atongi yango likolo na Makomi, mpo na kotalisa ete makambo azalaki kosala elongobanaki na Makomi. Atako ekesanaki na oyo bango bazalaki kondima, kasi azalaki kolakisa bango ete ezalaki Makomi.

³³ Boye, nakanisi ete biso . . . Nyonso, ndenge nalobaka mbala mingi, bandeko, bino baoyo bozalaka na mayangani, ete, soki mokolo moko bomoni ngai koloba makambo oyo elongobani na Makomi te, na ntango wana nakanisi ezali solo ete . . . to ndeko mosusu nyonso, tosengeli koya moko epai na moninga pe koloba: “Likambo yango ezali na Biblia te,” bomoni. Soki ezali kati na Biblia, bokoki kozala na ndimbola oyo ekeseni; kasi, ezali, soki ezali kati na Makomi, malamamu.

³⁴ Bongo, Polo azalaki kopesa ndimbola na ye ya makambo oyo mosakoli alobáká, oyo Mose alobáká, oyo ezalaki kokokisama. Pe akutanaki na Yesu na nzela, kati na emononeli. Pe Yesu yango abengaki ye.

³⁵ Nde, esengelaki te kozala likambo ya makasi mpo na Bayuda wana, ndenge alobaki: “Moto na lokumu Festus,” pe—pe bongo na bongo, ete “ekoki kozala likambo ya kokamwa mpo na yo, ete Nzambe akosekwiwa bakufi?” Bomoni? “Mpamba te, soki oyebi oyo Nzambe azaláká kala, na nzela na—na Makomi, na ntembe te, okoyeba ete Azali na makoki ya kosekwiwa bakufi.”

³⁶ Na nsima alobaki, ayebisaki bango likambo oyo abikelaki na nzela ya Damaseke, oyo esalemaki, ete, mpo bayeba ete Yesu oyo—oyo ye ateyaki bango pe yango epesaki bango mobulu mingi, azalaki mpenza Nzambe, oyo bazalaki kosalela ntango nyonso. Mpamba te, Azaláká na biliki elongo na bango, Ye nde azalaki kokamba bango, Azalaki Pole yango; Móto, Likonzi ya Móto oyo ezalaki kokamba bango. Pe Amonanaki na Polo na lolenge yango moko, Pole lisusu, oyo ebomaki ye miso. Pe atunaki: “Yo Nani, Nkolo?”

³⁷ Pe Alobaki: “Ngai Yesu, oyo ozali konyokola. Pe ekozala na yo mpasi kotuta makolo na makonga.”

³⁸ Pe amekaki kolimbolela bango likambo yango, pe—pe azalaki koluka kolakisa bango ete likambo oyo azalaki kotalisa na bato, ezalaki, ete “Yesu Klisto azalaki Masiya, Akufaki, pe

Nzambe asekwisaki Ye.” Pe yango ekokanaki na Makomi. “Pe sikawa Amataki Likolo, epai na Nzambe Tata,” pe ete—ete ye azalaki motatoli ya lisekwa na Ye. Pe, ete bikamwiseli, bilembo, ná bikamwa oyo, oyo ezalaki kokamwisa bato, ezalaki na yango makambo ya sika te mpo na mondimi ya solosolo ya Makomi, mpo Biblia esiláká kolobela yango.

³⁹ Botala na eleko ya basakoli, ndenge esakolamáká, makambo, ntango Masiya akoya, pe makambo Akosala: “Motengumi akopumbwa lokola mboloko,” na Yisaya 35 ná Makomi ndenge na ndenge oyo akokaki kolobela. Tokomaki yango awa te, kasi ntango mosusu azalaki kozua yango pe kolobela yango na mokuse, ntango azuaki maloba liboso ya bakonzi; mpamba te, ntango mosusu bazalaki na motema molai te epai na ye lokola bozali na yango mpo na ngai. Bongo, na nsima a—azalaki kolimbola yango, pe komeka koyebisa bango ete Nzambe moko oyo bazalaki kosalela . . .

⁴⁰ Pe, lisusu, alobaki: “Na lolenge oyo bazali kobianga *lipengwa*,” elingi koloba “liboma,” bomoni. “Lolenge oyo bazali kobianga lipengwa, na lolenge wana nde ngai nasambelaka Nzambe oyo bino bosambelaka.” Bomoni, “Na lolenge oyo bazali kobianga lipengwa.”

⁴¹ Nayebi malamula ete, lelo, soki totelemi ná mangomba epai tozaláká kosambela kala, lokola ba-Presbiterien, ba-Katoliko, ba-Batiste, ná oyo mosusu, tokoki kopesa litatoli yango moko epai na baoyo balobi ete balingi, ndakisa, kotinda ndeko mobali oyo na lopitalo ya bato na liboma, to na esika moko ya ndenge wana. “Na lolenge oyo bazali kobianga lipengwa, na lolenge wana nde ngai nasambelaka Nzambe ya bankoko na biso.”

⁴² Pe ezalaki mpenza litatoli monene liboso na Agilipa, na lolenge ete ata ntango azalaki naino koloba, Agilipa agangaki, pe alobi: “Polo, Saulo, na mwa ntango moke okondimisa ngai nákóma Moklisto.” Bomoni, ateyaki Makomi polele mpenza, atako ekesanaki na eyanganelo na ye moko. Kasi Makomi ezalaki mpenza polele be, na lolenge ete alobaki: “Na mwa ntango moke okondimisa ngai nákóma lokola yo.”

⁴³ Polo alobaki: “Nakosepela ete bokoma bongo, bino nionso, bobele nakolinga te ete bozala na minyololo oyo lokola ngai, bomoni,” kasi ákóma mondimi lokola ye. Na elobeli mosusu, soki ngai . . . “Nakosenga na Nzambe ete ómona emoniseli ndenge—ndenge ngai namonaka yango.” Na elobeli mosusu, “Na—nakosepela mpenza ete ókóma bongo.” Bomoni? “Nakosepela mingi ete osala yango.”

⁴⁴ Ntango Festus, nabanzi, alobaki na ye ete “atangaki mingi mpenza,” ete azuaki “mobulu na motó na ye.” Kasi ayebisaki ye ete e—ete ezalaki bongo te; ete a—ayebaki esika akómaki.

⁴⁵ Pe nalingi koloba boye, na ntongo oyo, bandeko. Nakosepela mpenza kokoka . . . Mpo na komikokanisa na bomoi ya Polo te,

kasi bobele mpo na kotia mwa moboko. Mpamba te, bato mosusu mingi bazali awa oyo, ntango mosusu, bakoloba na ntongo oyo, kasi nalingaki kozua libaku oyo mpo náloba yango. Sikawa, nakosepela ete lingomba moko na moko, ndenge nayokaki bino kotanga yango, Tempelo ya Bethel, ba-Independant, ba-Assemblée de Dieu, ná baoyo mosusu. . . Nakosepala bókoka komona mpenza makambo ngai namonaka; ete bókoka komona. Nakosepela bókoka komona emononeli ngai namonaka, bongo bokozala na lisosoli polele koleka, na mosala ya koteya.

⁴⁶ Ntango nalongwaki na lingomba Batiste, mpo náya na pantekote; pe Docteur Roy E. Davis, oyo abulisaki ngai na église Missionnaire Batiste, alobaki na ngai ete nalotaki nde ndoto ya mabe, ntango emononeli na Nkolo eyaki ko—kosolola na ngai. Pe—pe boyebi oyo lobiko na nzoto ezalaki na eleko wana, ezalaki na nse mpenza.

⁴⁷ Pe—pe nayebaki eloko moko te na ntina na ba-Pantekotiste. Nayokáká ete bazali batúntuki oyo balalaka na nse pe batangaka nsoi lokola ba-mbwa ya liboma, pe basengelaki kopepa bango mopepe mpo na kozongisela bango mpéma, ná makambo ya ndenge wana. Yango nde nyonso oyo ngai nayebáká na ntina na ba-Pantekotiste.

Alobaki: “Okanisi nani akoyoka yo?”

⁴⁸ Nalobaki: “Soki Nzambe atindi ngai, esika moko ezali pe moto moko azali epai Atindi ngai.” Ya solo. Bomoni? Mpamba te, nalobaki: “Docteur Davis,” nalobaki, “Azalaki mpenza wana; natelemaki wana pe natalaki Ye,” nalobaki bongo. Bango balobaki na ngai ete bimononeli wana. . .

⁴⁹ Ngai nazali mondimi monene, bandeko, ete—ete makabo pe kolangama ikobotolama te. Na—nandimaka yango. Obotámá, okoki te kozala eloko oyo yo ozali te. Pe soki omeki komikómisa eloko oyo yo ozali te, ozali bobele kosala mosala ya moto na bilongi mibale. Pe Nzambe átika ngai nákuza liboso ete nákóma moto na bilongi mibale, bomoni. Názala bobele oyo nazali, na nsima nde násosolisa yango malamumu. Pe—pe, na nsima, ná—názala bongo, na nsima nde moto nyonso akoyeba. Na ntango wana bokoyeba malamumu mpenza.

⁵⁰ Bongo sikawa, ndenge boyebi, ngai natángá mingi te, ndenge nalobaki. Boye kati na . . . mpo na likindo, ngai nde moyinga ya suka. Pe nabanzi ete boyebi yango, bomoni. Pe lokola motei, ezali mpasi mpo namibenga motei, mpo natángá te pe nayebi maloba te, pe bongo na bongo. Kasi moke oyo nazali na yango, na . . . boyebi na ngai, na ngolu na Ye, ya koyeba Nkolo Yesu, namekaka kokabola yango ná bandeko na ngai nyonso, na bisika nyonso, kokabola yango.

⁵¹ Pe, kasi, ntango nalongwaki na lingomba Batiste; yango nde lingomba bobele moko, oyo nakótá, to oyo nabulisamaki kati na yango. Pe nabulisamaki na mobu 1933, na église Missionnaire

Batiste, na Jeffersonville, Indiana. Ezali mo—mo . . . ezali moko na mangomba ya Likita ya Mangomba ya Súdi. Bongo biso, na ntango wana, ngai . . . ntango nabimaki pe na . . .

⁵² Sikawa, lingomba Batiste ezali lingomba ya bonsomi. Bisó—bisó nyonso toyebi yango, ete ezali—ezali . . . Okoki koteya penepene nyonso oyo olingi, soki losambo na yo bandimi yango. Bango . . . Okoki koteya nyonso oyo olingi.

⁵³ Pe ngai nalingaka bongo, bomoni, mpo nandimi ete elongobani na bantoma. Mpamba te, mokonzi, molongo ya likolo kati na lingomba, ezali nde mobateli, tososoli bongo, mokengeli. Pe—pe soki mo—mo . . . Soki eveke to moto mosusu akolongola emoniseli oyo mokengeli azali na yango, ndenge nini Nzambe akosala lisusu kati na lingomba na ye? Bomoni, okoki mpenza kososola yango te. Boye, pe nazali na . . .

⁵⁴ Ntango nalongwaki kuna, nakutanaki na etonga ya liboso, oyo ezalaki lobiko na nzoto ya elenge mwasi Betty Daugherty, na St. Louis, na Missouri. Ezalaki lingomba ya ba-Pantekotiste Unie, to église Pentecotiste du Nom de Jésus, mokengeli yango azalaki kosambela kuna, pe mwana na ye ya mwasi abikisamaki na nzoto. Na bosembo, nakanisaki ete yango nde esalaki ete ázala pantekotiste, mpo bazalaki komibenga bato ya “Yesu Kaka.” Pe nakanisaki ete yango nde esalaka ete bázala ba-pantekotiste, mpo bazalaki komibenga bongo, pe yango nde ezalaki bokeseni. Bongo, ee, nde kolongwa wana nakendeke na . . .

⁵⁵ Pe mobali moko malamú; tozalaki na liyangani moko ya monene na St. Louis, fotó na yango ezali na kati kuna. Tozuaki Eyanganelo ya Kiel; pe na mpokwa ya liboso, to ya mibale, bato nkoto zomi na minei batondisaki yango meke, pe tokokaki ata te . . . tosengelaki kotia bapulúsu pembeni na bikuke, mpo bato bákoba kokota te.

⁵⁶ Pe kolongwa wana, nakobaki kino epai ya Richard T. Reed, ya Tabernacle ya Bon Vieux Temps ya Biblia, na Jonesboro, ye pe azalaki moto ya ebongiseli yango. Pe kolongwa wana, kino epai ya Docteur G. H. Brown, ya ebongiseli yango, na 505, Balabala Victor na Little Rock, Arkansas. Pe, kolongwa wana, kino na libongo ya wésti.

⁵⁷ Na nsima, ntango nakómaki na libongo ya wésti, nakutanaki na móto. Nde nasosolaki ete bokabwani ezalaki mingi kati na ba-pantekotiste, kati na bibongiseli na bango, lokola kati na biso ba-Batiste. Bomoni, bokeseni ezalaki—ezalaki mingi mpenza, ezalaki, bazalaki na bokeseni ndenge na ndenge. Ba-Assemblée de Dieu bazalaki, ba-Eglise de Dieu, ná baoyo mosusu, ná baoyo mosusu, ná baoyo mosusu, pe—pe bokeseni. Bakabwanaki kati na bango, pe batiaki ba-ndelo mike mike. Pe bandeko mosusu nyonso babandaki koya epai na ngai, koyebisa ngai: “Oh, ozali moto ya Yesu Kaka, ná etonga oyo kuna.”

Nalobaki: “Te, ngai—ngai namibengaka bongo te.” Bomoni?

Alobaki: “Kasi, osanganaka na bango.”

⁵⁸ Nalobaki: “Ee, yango—yango ekómisi ngai moko na bango te.” Bomoni? Pe nalobaki: “Na—na—na bobele... Bazalaki bandeko.”

⁵⁹ Pe alobaki: “Oh, bazali etonga ya... Oh, bazali na eloko mosusu te bobele bitape epai bingondó bakitaka pe nyonso wana, kuna, ndenge wana. Esika...”

⁶⁰ Nalobaki: “Sikawa, limbisa ngai. Nakutanaka na bato malamú mpenza kuna. Pe bazali bato na Nzambe.” Pe nalobaki: “Na—nakondima ata moke te ete bábenga bango bato mabe; mpo bazali mabe te.”

⁶¹ Ee, bongo, natelemelaki yango ntango molai, kozanga kopona ngámbo moko to mosusu. Ee, nabandaki koyekola soki makanisi na bango ezalaki nini, bokabwani na bango ezalaki nini, pe eloko nini esalaki ete bákabwana. Pe namonaki ete bitonga minene ezalaki mibale kati na bango, moko na yango, nkombo na yango Yesu Kaka, pe oyo mosusu nkombo na yango ba-Assemblée de Dieu. Pe babimisamaki, to bakabwanaki, mpo na likambo ya libatisi na mai; bamoko bazalaki kosalela “Tata, Mwana, Molimo Mosantu,” pe bamosusu bazalaki kosalela Nkombo ya “Yesu”.

⁶² Ee, natalaki, pe na ngámbo nyonso mibale bazalaki na bato minene, basali na Nzambe. Pe nakanisaki: “E Nzambe, soki nakokaki komona bango nyonso kokóma... kokende liboso pe kosala... kasi bátia ba-ndelo te, koloba: “Tokoyokana te kati na biso.”” Kasi namonaki, na kati, ete molimo mabe esilaki kokota kati na bango pe kotia koyina pe mayele mabe, na makambo oyo esilaki kokómela bango. Namilobelaki, ekómi mpenza makambo oyo Zabolo alingaka. Yango mpenza nde oyo ye alingaka. Na ntango nyonso oyo bozali kotalisa mandóki bamoko na bamosusu, ye azingi na ye maboko. Pe ngai... .

⁶³ Bongo, sukasuka, ntango ya kosukisa makambo, ezalaki na mboka Seattle, na Washington, pene na mobu 1946. Pe mokolo moko na ntongo, bamemaki ngai na esika moko ya monene na kati ya hotel, lokola oyo boye, mpo na—mpo na kolia bilei ya ntongo elongo na mwa batei. Pe nasengelaki kosolola na mibali mibale, bakambi.

⁶⁴ Pe moko na bango ezalaki Docteur Ness. Nabanzi ete bino bandeko ya ba-Assemblée de Dieu bobosani ye te. Azalaki kofanda na nor-west; moto monene, ya mayele, ya mayele mingi. Ye azalaki ntoma ya ba-Assemblée de Dieu.

⁶⁵ Na nsima, Docteur Scism, ya église Pentecotiste Unie. Nabanzi ete bino bandeko ya ba-Pantekotiste Unis, bobosani ye te. Ye pe azalaki kofanda kuna na nor-west, azalaki mokonzi na bango, pe ya bamboka ya kuna.

66 Ee, mibali mibale oyo bakutanaki. Pe esengelaki bamema ngai liboso na bango, mpo ko—kobendana ebandaki kokóma makasi, pe bakómaki kobundisa ngai na ngambo nyonso. Pe namilobelaki: “Nasengeli kosala nini? Nakoki kosala nini?”

67 Sikawa, ee, bazalaki koloba: “Ee, yo osengeli kozua ngámbo ya moko to mosusu. Soki olingi kotambola elongo na bato ya Nkombo na Yesu, osengeli kozala moto ya Nkombo na Yesu. Pe soki otamboli elongo na ba-Assemblée de Dieu, osengeli kotika bato ya Nkombo na Yesu, pe kozala moto ya ba-Assemblée de Dieu, to bango.” Ekómaki na esika moko oyo nasengelaki kotalisa likanisi na ngai.

68 Nabondelaki mingi na ntongo wana liboso ete nakende kuna. Nalobaki: “E Nzambe, sunga ngai. Mpamba te, bato minene mibale bazali kuna; basali nkoto na nkoto bazali kuna. Pe Yo moto otíndá ngai awa na mosala ya koteya. Pe bango mibale bazali basali na Yo. Pe nasengeli kopesa mwa lisungi oyo nazali na yango na ebongiseli moko, na ntango oyo ezali kobundisa oyo mosusu?” Bomoni? “Na—nakoki komiyoka malamumu te soki nasali bongo. Nandimi te ete ekozala mokano na Klisto ete násala bongo.” Pe nalobaki: “E Nzambe, sunga ngai pe pesa ngai eloko ya kosala, to pesa ngai eloko ya koloba.”

69 Pe, nazalaki na moto moko te. Nasengelaki bobele kotelema wana, kaka Nkolo Yesu ná ngai, na ntongo wana.

70 Ee, kowelana monene ebandaki. “Okosala nini? Mokano nini—nini—nini okozua?”

71 Nalobaki: “Nasilaki kozua mokano na ngai. Bongo, mokano na ngai, ezali ete nátelema na katikati na bino mibale, kasi nakokota na ebongiseli moko te; pe wana nazingi bino nyonso mibale na maboko na ngai, náloba: ‘Tozali bandeko.’” Bomoni? Bomoni, tozali bandeko. Bomoni? Pe nalobaki: “Nameki kotanga ba-buku nyonso oyo nakokaki kotanga, ndenge likambo yango ebandaki, oyo bazalaki kobenga ‘likambo ya sika,’ pe ndenge bakabwanaki, pe ndenge *songolo* abandaki boye na boye.” Pe nalobaki: “Na kowelana oyo bozali na yango,” nalobaki, “ezali ndenge moko na oyo ekabolaki ba-pantekotiste, na ntango. . . nsima na Pantekote. Bakómaki kowelana kati na bango.” Pe nalobaki: “Likambo yango ezali kokabola kino lelo.”

72 Nalobaki: “Nzela ekoki kozala, ete esika moko ya boyokani ézala kati na bino, bino bandeko? Eloko moko, oyo—oyo ekoki kosimba, ezali te?”

73 Ee, baboyaki kofungola monoko na ntina na yango, mpo ezalaki matáta mpenza. Eleki mibu soki zomi na mitano to ntuku mibale, boyebi ndenge ezalaki, mpo etonga moko eutaki kokabwana na oyo mosusu, pe koswana ezalaki makasi.

74 Boye nalobaki: “Ee, bandeko, nakosala boye. Nakokende na . . . Nzambe atíndá ngai mpo na kobatisa te, ata bongo. Atíndá ngai mpo na kobondela mpo na bana na Ye ya maladi.” Nalobaki:

“Na bongo, ngai nako—nakobondela mpo na bana oyo bazali kobela, pe bino batei, bokobatisa bino moko,” nalobaki bongo.

⁷⁵ Nalobaki: “Sikawa, nalingi kotuna bino likambo moko, mpo bósosola.” Nalobaki: “Ndeko Ness, ondimi ete bato ya Nkombo na Yesu bazuaki Molimo Mosantu ntango balobaka minoko na sika pe basalaka ndenge bosalaka na ba-Assemblée de Dieu?”

Alobaki: “Na ntembe te.”

⁷⁶ Nalobaki: “Ndeko Scism, ondimi ete bato ya ba-Assemblée de Dieu bazali na Molimo Mosantu ntango balobaka minoko na sika pe basalaka ndenge bino bosalaka nsima na libatisi?”

Alobaki: “Ya solo, nandimi yango.”

⁷⁷ Nalobaki: “Sikawa, Biblia elobi: ‘Nzambe apesaka Molimo Mosantu na baoyo batosaka Ye.’ Sikawa, nani atosaki Ye? Nani atosaki Ye? Nani kati na bino atosaki Ye? Pe Nzambe apesi na bino mibale Molimo Mosantu, bomoni.”

⁷⁸ Nalobaki: “Ndeko Scism, okoki koloba ete Ndeko Ness azali na Molimo Mosantu te?”

Alobaki: “Te.”

⁷⁹ Nalobaki: “Okoki koloba ete Ndeko Scism azali na Molimo Mosantu te?”

⁸⁰ “Te.” Bomoni? Boye, bango mibale bazalaki kondima ete moninga azali na Molimo Mosantu.

⁸¹ Kasi, bomoni, ezali na ntina moko te, bandeko. Ezali na ntina moko te. Pe nayokaki, nsima na mwa ntango ete . . .

Nakozongela liteya na ngai nsima na mwa ntango.

⁸² Bandeko ya Finlande oyo, nsima na ngai kolongwa na Finlande; epai wapi Nzambe apesaki biso, ndenge nakanisaki, moko na mayangani na biso ya minene koleka. Epai elenge mobali oyo akufaki asekwaki, ná makambo mingi. Na Stockholm, na Suède, nakutanaki na Lewi Pethrus ya lingomba Filadelfia, azali moto monene ya Nzambe, ná lingomba Filadelfia. Ndeko Gordon Lindsay, oyo azalaki, sikawa . . . nakanisi. Nandimi te ete azali mondimi na yango sikawa, kasi azaláká mondimi ya ba-Assemblée de Dieu.

⁸³ Pe ba-Assemblée de Dieu bazali moko na bapesi misolo minene ya mayangani na ngai, na mokili. Ná bato ya Foursquare, oyo bauta na ba-Assemblée de Dieu, bazali moko na bapesi misolo minene na ngai. Ba-Unitaire, na mokili mobimba, bazali moko na bapesi misolo minene na ngai. Bomoni? Pe nazuaki lolenge wana, bobele mpo na kosilisa mindondo, pe na nsima nazuaki mokano, ete nakozua ngámbo moko te kati na kowelana wana. Kino ntango tokomona ete tozali bandeko, pe tokosangana, nde biso—bisó nyonso tokomona likambo yango moko mpenza, epai, tozali kokoma, mposa pe ntina tozali kosala bongo.

⁸⁴ Pe o—osengeli liboso komeka mposa pe ntina ozali kolanda. Liboso, luka mokano na Nzambe; na nsima luka koyeba ntina ozali kolanda; na nsima meka mposa na yo mpo óyeba soki mposa na yo ezali malamu. Na ntango wana, ndenge Yesu alobaki na Malako 11:24: “Soki olobi na ngomba oyo ete, ‘longwa,’ pe otii ntembe na motema na yo te.” Kasi soki ozali na ntembe na motema, ya koyeba soki ezali mokano na Nzambe to te, soki mposa na yo to ntina ozali kolanda ezali mabe, ekolongwa ndenge nini? Kasi soki oyebi ete mposa na yo ezali malamu, pe ezali mokano na Nzambe, pe ntina oyo ozali kolanda ezali malamu, esengeli kolongwa. Esili, soki te, Nzambe alobaki likambo moko ya lokuta.

⁸⁵ Yango nde ntina mpenza, ntango namataka na eteyelo, na ba-ndakonzambe, moto moko te ayóká ngai kolobela makambo yango na eteyelo, makambo wana. Natiaka yango kaka pembeni. Bomoni, yango etali nde bino, bandeko. Bomoni? Ngai nazali awa mpo na kosunga bino ete bómema milimo epai na Klisto, na nzela na likabo na Nzambe, bomoni. Bomoni? Ebongoli eloko moko te. . . Bino moko bopesa libatisi na bino. Kasi nde, soki ekómi likambo. . .

⁸⁶ Ya solo, bafinga ngai na ndenge nyonso. Bafinga ngai, nayebi te boni, nyonso, longwa na—na “mwana na Nzambe oyo alati nzoto” kino na—na “zabolo.” Ya solo, nyonso. Kasi, na suka ya nyonso wana, nazali ndeko na bino, mwana mboka ya Bokonzi na Nzambe; nazali kosala elongo na bino nyonso, mpo na Bokonzi. Pe ezali ya solo.

⁸⁷ Sikawa ngai, soki ezali mabe te, pe soki bomoni ete tozali na ntango oyo ekoki, nakosepela koyebisa bino ndenge masolo yango elekaki. Mpo na mwa ntango, bandeko, ekozala mabe te? [Batei balobi: “Koba na yo. Iyo.”—N.D.E.] Ndeko, Ndeko Ness ná bamosusu. . . Malamu. Pe ekoki kozala mwa eloko oyo ekoki kosunga bino. Ekoki kosunga bino mpo bososola, mwa moke.

⁸⁸ Nakomaki na lokasa oyo, makambo mosusu oyo namikaniselaki. Ebandaki wana. Na bongo, batunaki ngai, soki nandimaka nini na oyo etali “bosato bosantu,” soki nandimaka ete “bosato bosantu” ya Nzambe ezalaka?

⁸⁹ Nzoka nde, bandeko, ntango tokolobela yango, nazali kolikia ete ntango yango ekosila, tokozala kaka bandeko ndenge tozalaka bandá kala. Bomoni? Kasi namoni ete nasengeli kopesa bino yango, mpo bato na bino bayaka na mayangani na ngai, pe ya solo mpenza, nakolinga te kozongisa moko na bango, wana asili kopengwa.

⁹⁰ Pe nalobaka ntango nyonso na bato oyo batunaka ngai mituna, libanda na oyo nateyaka na eteyelo. . . Pe sekretère na ngai ye oyo, pe nyonso. Soki batuni ngai motuna: “Olobi nini mpo na likambo *oyo*, to olobi nini mpo na likambo *oyo kuna*?”

⁹¹ Nalobaki: “Tuna mokengeli na yo, omoni. Mpamba te, soki akambi yo kino awa, pe ozui Molimo Mosantu, akokoba pe kotambwisa yo, omoni. Yo, omoni, tuna nde mokengeli na yo.” Mpamba te, makambo ya mike ndenge wana epesaka mobulu, pe yango wana nakímaka yango, bomoni.

⁹² Sikawa, pe balobaki na ngai ete nazali mo—mobundisi ya bibongiseli. Kasi, ezali bongo te. Nakanisi ete bibongiseli ezali malamumu mingi, kasi soki mimesano na bino ya ebongiseli na bino ebebi, yango nde eloko ngai natelemelaka. Bomoni? Ata ezali bomoko, to—to ezali bosato, to eloko nini, mimesano; ntango bokómi na esika oyo, bino . . . pe bolobi: “Biso tozali ba-Assemblée de Dieu.”

“Ee, banani wana, na ngámbo ya balabala?”

⁹³ “Oh, ezali bandeko na biso. Ba—babengaka bango ba-Pantekotiste Unis.”

“Ee, bongo baoyo kuna nde banani?”

⁹⁴ “Oh, ezali bandeko ya Foursquare. Oh, tozali bandeko malamumu mpenza. Toyokanaka malamumu, kati na biso.”

“Oh, bino nyonso bondimaka ndenge moko?” “Oh, iyo, ezali bongo.”

“Bongo, kasi, eloko nini esali ete bokóma boye?”

⁹⁵ “Ee, bandeko *oyo* babatisaka *boye*. Pe *baoyo* babatisaka *boye*, bapesi biso mokongo. Pe *baoyo* babatisaka . . .”

⁹⁶ Lokola kuna na Afrika ya Súdi, ndeko, tomonaki likambo yango. Batunaki ngai. Etonga moko babatisaka mbala misato, na liboso. Pe oyo mosusu bazalaki kobatisa mbala misato, na nsima. Pe balobaki . . . Nalobaki: “Bozuaka yango wapi?”

⁹⁷ Moko alobaki: “Ntango Akufaki, Biblia elobi ete agumbaki motó na liboso,” pe alobaki, “yango wana tosengeli kogumba bango na liboso.”

⁹⁸ Pe nalobaki: “Bongo,” mpo na etonga mosusu, “nini . . . Bongo bino?”

Alobaki: “Basilá kokunda moto elongi kotala na nse?”

⁹⁹ Ee, pe boyebi nini? Bakabwani pe basali bitonga mibale, bibongiseli mibale. Oh, mawa, bandeko! Yango nde likambo Moyini alingaka. Yango nde mpenza likambo na ye. Iyo. Bino moko . . .

¹⁰⁰ Sikawa, bomoni, ezali Mission ya Foi Apostolique te, to—to ezali moko to mosusu kati na Balosambo ya ba Pantekotiste, na ngambo mosusu. Ezali yango te. Bato malamumu bazali na bitonga nyonso mibale, awa pe bazali. Kasi, bomoni, ezali nde mimesano ya likambo yango.

¹⁰¹ Ezali mpenza lokola Ba-katoliko, ndenge nalobaka mbala na mbala. Soki moto azali Mo-katoliko, kasi ataleli Klisto mpo na lobiko, abikisami. Na ntembe te, ya solo. Soki ataleli lingomba,

abungi. Pe ndeko nyonso na kati na bino ba-pantekotiste ayebi, ete soki totaleli lingomba Pantekotiste mpo ébikisa biso, “tozali, kati na bato, oyo ya mawa koleka,” ya solo, mpo tobungi. Ya solo.

¹⁰² Soki totaleli Yesu Klisto, nde tobikisami, “na kondima na yo,” (elingi koloba nini?) mosala oyo ekómi na suka. Kasi makambo ya mike-mike ya mosala, ya bankombo, ebongolaka eloko mpenza te.

¹⁰³ Bongo, nalobaki na Ndeko Scism, na . . . pe Ndeko Ness: “Mpo na koyanola motuna na yo,” nalobaki, “sikawa, nakozua ngámbo ya moko na bino te bandeko. Pe nayebi, ete na ntango nyonso oyo bozali koswana, bino mibale bokwei na likambo. Bomoni? Mpamba te, malamú názala na libunga na malakisi na ngai, kasi sembo na motema na ngai, na esika ya kozala sembo na malakisi na ngai, kasi na libunga na motema na ngai.” Bomoni? Nalobaki: “Nsima na nyonso wana, etali nde lolenge ya motema na yo.”

¹⁰⁴ Pe nasalelaki yango, nde nayebi likambo oyo: ete, soki moto, ata soki asali nini, pe azali na boyokani na ngai te, pe alobi nini mpo na ngai; soki na motema na ngai, kaka lokola lotomo te, kasi uta na motema na ngai, soki nakoki kolinga moto yango ndenge nalingi moto mosusu te, wana nayebi ete mwa mbeba ezali na kati awa, bomoni. Ya solo, mpo, ezali—ezali . . . ata soki ye . . .

¹⁰⁵ Ndeko mobali moko ya elenge ayaki, eumeli te, ndeko moko ya elenge ya Eglise de Christ. Pe, oh, atelemaki wana, pe alobaki: “Mobali oyo azali zabolo.” Bomoni? Alobaki: “Alobaka na ntina na Molimo Mosantu.” Alobaki: “Ezalaka te. Bango, ee, bobele bantoma zomi na mibale nde bazuaki Molimo Mosantu. Pe—pe lobiko na nzoto kouta na Nzambe epesamaki bobele na bantoma yango zomi na mibale.” Pe akobaki koloba, penepene miniti ntuku misato.

¹⁰⁶ Pe nalobaki: “Zela mwa moke, ndeko. Nakanisi ete osengelaki kopesa ngai libaku ya kolobela Yango, omoni.” Nalobaki: “Olobaki ete olobaka soki Biblia elobi, pe ofandaka kimia soki Efandi kimia.”

Pe alobaki: “Biso tosalaka bongo.”

¹⁰⁷ Nalobaki: “Nzoka nde, olobaki bobele bantoma zomi na mibale bato bazuaki Molimo Mosantu. Biblia elobi: ‘Bato bazalaki mokama na ntuku mibale na ndako na mokili ya likolo ntango Molimo Mosantu akitaki, basi pe nyonso.’ Pe okoki koyebisa ngai, okanisi ete Polo azalaki na Molimo Mosantu te? Pe ye azuaki Yango ntango molai nsima na yango, omoni. Kasi yo olobaki: ‘Likabo ya lobiko na nzoto kouta na Nzambe epesamaki bobele na bantoma zomi na mibale.’ Pe Etiéni akitaki, nsima na mwa mikolo, kasi azalaki moko na bango zomi na mibale te. Azalaki ata motei te. Azalaki mosungi, akendeki na Samalia pe abenganaki milimo mabe.” Pe nalobaki:

“Oh, ndeko!” Kimia mpenza ekotaki wana, iyo, na esika oyo bosengelaki kofanda kimia.

¹⁰⁸ Pe na nsima, ntango esilaki: “Kasi,” nalobaki, “nalimbisi yo ndenge obengaki ngai zabolo, mpo nayebi ete olingaki mpenza koloba bongo te.”

¹⁰⁹ Bongo, ntango asilisaki, ayaki epai na ngai. Alobaki: “Likambo ya koloba ezali kaka moko. Ozali na Molimo na Klisto.”

¹¹⁰ Nalobaki: “Sikawa, ndeko, nazali nani, moyini to moto ya Klisto?” Bomoni? Bomoni?

¹¹¹ Kasi nalobi na bino, bomoni, ezali ete moto, akokaki komona ete nalingi ye; ata bongo, azalaki na boyokani te, pe azangaki mpenza boyokani pe azalaki kobundisa ngai. Ye. . .

¹¹² Ngai nazali moto ya bokila, pe elongo na banyama ya zamba, bomoi na ngai mobimba. Pe bato balobá: “Ndenge nini. . .” Mbala oyo nasengelaki koboma ngombolo wana, na mbeli, bomoni. Balobaki: “Ozalaki kobanga ye te?”

¹¹³ Nalobaki: “Te. Soki nábangaka ye, alingaki koboma ngai, bomoni.”

¹¹⁴ Kasi, omoni, okoki te—okoki kokosa bango te. Bayebaka soki ozali kobanga bango to te. Soki obangi mpunda, okomona oyo mpunda akosala, akoniata-niata yo. Omoni? Boye soki obangi. . . Okoki mpenza kokosa te. Osengeli mpenza kozala na yango.

Ezalaka pe ndenge wana mpo na Satana.

¹¹⁵ Ezalaka pe ndenge wana kati na bato. Osengeli kolinga bato. Okoki mpenza kokosa te. Osengeli nde kozala na yango, soki te okoyebana na esika moko boye, omoni. Ya solo. Osengeli mpenza kolinga bato, pe bayebi ete olingi bango. Omoni, likambo moko ezalaka wana.

¹¹⁶ Bongo mobali yango, abengaki mwasi na ngai, mikolo oyo, pe alobi: “Ndeko Branham azali?”

Alobaki: “Te.”

¹¹⁷ Alobaki: “Ee, nazali na likambo moko, oyo nasengeli koloba. Nazalaki na boyokani na ye te, na malakisi ya likindo, kasi nalobi ete azali mosali na Klisto.”

¹¹⁸ Ee, bongo, liboso ete nakende, atindelaki ngai mokanda, pe alobaki: “Nakoya kuna, ntango kaka okozonga. Nazali na mposa ya libatisi yango, ya Molimo Mosantu, oyo olobelaka.”

¹¹⁹ Boye, bomoni, bongo soki ozali na. . . Soki nazalaki na likanisi wana, ya koloba: “Oh, bozali na ntina te. Ebongiseli na bino ya kala wana, ezali na ntina te, pe—pe bato na bino nyonso ya Lingomba ya Klisto bazali na ntina te. Bozali na ntina te. Bozali—bozali milimo mabe.” Nalingaki kolonga mobali wana ata moke te. Pe soki náyebisaka ye ete nalingi ye, kasi na motema

na ngai ezalaki bongo te, alingaki koyeba yango. Esili bongo na yango. Osengeli kokanisa bongo na motema na yo.

¹²⁰ Pe ezalaka bongo na ba-mpokwa ntango namataka na etumbelo, na ntango ya kososola makanisi, bomoni. Nakanisaka yango te. Naliaka te, nsima ya bilei ya moi; kaka kokila pe kobondela, pe kofanda na biró. Mpamba te, Alakaki ngai ete Akosala yango. Yango wana ngai pe nakendeke ata na mwa ntembe moke te, mpo Alakaki ete Akosala yango. Boye, bomoni, ngai. . . Nayebi ete mposa na ngai ezali (nini?), ntina oyo nazali kolanda ezali (nini?), mpo Bokonzi na Nzambe ékende liboso.

¹²¹ Soki moto akei ngambo *oyo*, ngambo *oyo kuna*, ata soki asambelaka wapi; soki asili koya epai na Klisto, mpo na ngai, ekosala eloko te. Pe yango ezali kati na motema na ngai. Bomoni? Pe ekosala eloko te, soki tokei kosangana na Eglise de Christ, ezali na yango mabe te. Ezali malamu. Soki ye. . . Lingomba oyo asangani na yango, mpo na ngai, ezali na yango mabe te. Kasi lokola nasili kolonga molimo na ye mpo na Klisto, yango nde oyo ya motuya.

¹²² Bongo, nalobaki: “Ndeko Ness, ezali te mpo na kozala na bokeseni. . .” Sikawa nako. . . ndeko, nakoki kosalela *oyo*? [Ndeko yango alobi: “Iyo.”—N.D.E.] Nalobaki: “Nalingi koloba pe kolimbola.” Pe, na yango, nakoki koyebisa bino, bandeko oyo bozali awa. Kasi, bóloba likambo oyo na ba-losambo na bino te. Soki bolingi, pe bosalisa ngai, nátikala bobele—bobe—bobe ndeko na bino. Bomoni? Pe ngai, soki—soki nazali na libunga, na bongo bólimbisa ngai. Kasi nalingi kolimbolela bino, lokola bitonga nyonso mibale ezali awa na ntongo oyo, ná ya ba-Unitaire ná pe ya ba—ba-Assemblée, pe boyambi ya bosato bosantu.

¹²³ Sikawa nalingi náloba boye. Nalingi náloba ete ngai nandimi ete ngámbo nyonso mibale bazali na libunga, na ntango nyonso bazali kowelana, mpo ba-mposa na bango ezali mabe. Pe ntango nyonso ba-mposa na yo ezali mabe; ata ntina na yo ezali nini, kasi ba-mposa na yo mpo na likambo ozali kolanda ezali mabe, ekosimba ata moke te. Ya solo.

¹²⁴ Nzoka nde, bato mosusu balobaki: “Ndeko Branham, ozali moto ya Yesu Kaka.” Nalingi koloba ete ezali libunga. Nazali moto ya Yesu Kaka te.

¹²⁵ Moto moko alobi: “Ndeko Branham, ozali moto ya bosantu bosantu?” Te, misie. Nazali moto ya bosato bosantu te. Nazali Moklisto. Omoni? Ngai—ngai—ngai. . . Liloba oyo, moto ya bosato bosantu, ekomami ata kati na Biblia te, liloba “bosato bosantu.” Pe nandimaka te ete Banzambe bazali misato, oyo bakeseni.

¹²⁶ Nandimaka ete Nzambe azali bobele moko na misala misato; Tata, Mwana, Molimo Mosantu. Yango mpenza nde ntina tozuaki

etinda ya kobatisa na Nkombo ya Tata, Mwana, Molimo Mosantu. Nandimaka ete ezali Nzambe oyo amikitisi, oyo akiti.

¹²⁷ Sikawa, Nzambe, ntango amonanaki na bato mpo na mbala ya liboso, Azalaki na lolenge ya Likonzi na Móto. Bondimi yango, boye te? Li . . . Motangi nyonso ya Biblia ayebi ete Likonzi na Móto oyo ezalaki na biliki ezalaki Logos, ete ezalaki Mwanje na Kondimana, elingi koloba Klisto.

¹²⁸ Mpamba te, Alobaki . . . Azalaki . . . Ezalaki te . . . Nabanzi ezali na Yoane 6, Alobaki: “Liboso ete Abalayama ázala,” ete “NGAI NAZALI.” Azalaki “NGAI NAZALI.”

¹²⁹ Boye, ezalaki Nzambe, ya bulée; soki kaka moto asimbi ngomba kosimba mpamba, basengelaki koboma ye, bomoni. Malamu. Sikawa, Nzambe yango Azalaki koluka komizongisa kati na ekelamu na Ye oyo Akeláká. Kasi, Akokaki koya pene na bango te, mpo bazalaki basumuki, pe makila ya ba-ntaba ná ba-mpate ezalaki kolongola masumu te. Toyebi yango. Ezalaki bobele kozipa masumu.

¹³⁰ Sikawa, na bongo, Nzambe moko oyo azaláká Likonzi na Móto, Akómaki mosuni, na nzela ya Mwana na Ye, pe Afandaki na nzoto moko ebengami Nkolo Yesu Klisto. Biblia elobi: “Litondi mobimba ya Bonzambe efandaki kati na Ye na motindo ya nzoto.” Pe Yesu alobaki na . . . Ee, na Timote ya Liboso 3:16: “Libombami ya makambo na Nzambe ezali monene.” Soki bango bakokaki kobenga yango monene, bongo, biso tokosala nini, bomoni? “Libombami na Nzambe ezali monene, mpo Nzambe amonisamaki kati na nzoto, pe amonamaki na banje, pe anetolamaki na Nkembo,” pe bongo na bongo. Sikawa, pe na Yoane 14, Alobaki na Toma: “Ntango omoni Ngai, omoni Tata. Mpo na nini olobi, ‘Lakisa biso Tata?’” Biblia elobi, ete, “Nzambe azalaki kati na Klisto, kozongisa bato na mokili na bondeko epai na Ye.”

¹³¹ Sikawa, Nzambe akoki kozala bato misato te, Banzambe misato. Yesu pe akoki kozala Tata na Ye Moko te, kati na moko. Bomoni? Boye, bomoni, esali ete nyonso mibale ezali mpenza lokuta.

¹³² Sikawa, pe sikawa soki bolingi kotala malamumu, esika moko te ezali . . . Soki tozali na Banzambe misato, tozali bapagano. Wana, toyebi yango.

¹³³ Lokola Moyuda moko alobaki na ngai mokolo moko, ntango nazalaki kosolola na ye, alobaki: “Nani na kati na bango azali Nzambe na bino? Oyo wapi nde Nzambe na bino; Tata, Mwana, to Molimo Mosantu? Oyo ya bino ezali oyo wapi?”

Nalobaki: “Ee, Banzambe bazali misato te.”

¹³⁴ Alobaki: “Bokoki te kokata—kokata Nzambe na biteni misato pe bópesa Ye na Moyuda.”

Nalobaki: “Te, misie.” Nalobaki . . .

135 Ntango John Rhyn abikisamaki na bokono ya kokufa miso, kuna na Fort Wayne, boyebi; pe labi oyo ya Mishawa- . . . to na Fort . . . Benton Harbor. Alobaki: “Bokoki te kokata Nzambe na biteni misato pe bopesa Ye na Moyuda.”

136 Nalobaki: “Soki moke te. Nazali kosala bongo te.” Nalobaki: “Labi, ekoki kozala likambo ya makasi mpo na yo kondima basakoli?”

Alobaki: “Te.”

137 Nalobaki: “Na Yisaya 9:6, azalaki kolobela nani: ‘Mwana abotameli biso, Mwana apesameli biso, Akobengama Mosungi, Nzambe na Nguya, Nkolo na Kimia?’”

Alobaki: “Ezalaki Masiya.”

Nalobaki: “Bongo, labi, Masiya akozala nani mpo na Nzambe?”

Alobaki: “Akozala Nzambe.”

138 “Yango nde oyo nakanisaki.” Bomoni? Sikawa, bomoni, ya solo mpenza. Yango nde oyo Ye azali. Bongo nalobaki: “Yebisa ngai sikawa esika nini Yesu azangaki kokokisa mpenza oyo mosakoli alobáká ete Akosala.” Pe abandaki kolela pe kotambola-tambola. Nalobaki: “Na nzela na Yango, John Rhyn amoni lisusu.” Bomoni?

Pe alobaki: “Mosika na Nzambe likanisi ya kozala na mwana!”

139 Nalobaki: “Yawe monene azipaki mwasi moko na elili na Ye, ndenge mosakoli alobaki ete Akosala, pe Akelaki momboto ya Makila. Pe na nzela ya momboto yango ya Makila nde esika nzoto ya Klisto eutaki.”

140 “Tala, na Kondimana na Kala, Labi,” nalobaki, “ntango moto akei kopesa mbeka, azalaki komema mwana na mpate. Ayebaki ete abuki mibeko ya Nzambe, yango wana amemi mwana na mpate. Azalaki koyambola masumu na ye, pe bazalaki koboma mwana na mpate yango. Wana lo . . . wana atii maboko na ye likolo na mwana na mpate yango; koyambola ete ayebi ete asengelaki kokufa mpo na lisumu na ye, kasi mwana na mpate azui esika na ye. Pe momboto ya makila ezalaki kopasuka; pe azalaki kosimba mwa mwana na mpate yango na maboko na ye kino áyoka ete mwa bomoi ya mwana na mpate ebimi, pe nzoto na yango ekómi makasi. Na nsima nganganzambe, na ntembe te, azalaki kobwaka makila likolo na—likolo na móto, etumbelo ya motáko ya kosambisama.”

141 Bongo nalobaki: “Na nsima, moto yango alongwe wana, koyeba ete mwana na mpate asili kozua esika na ye, kasi abimi na mposa yango moko oyo azalaki na yango ntango akotaki, bomoni, mpo ekokaki kolongola lisumu te. Bomoni? Kasi, nde, na mbala oyo: ‘Awa esili mosambeli kopetwa mbala moko libela, azali lisusu na lisumu kati na lisosoli na ye te.’ Kuna, mbeka

ezalaki kopesama mobu na mobu. Kasi,” nalobaki, “lelo, na mbala oyo, tozali na, ‘awa esili mosambeli kopetwa, azali lisusu na lisumu kati na lisosoli na ye te.’ Mpamba te. . .”

¹⁴² “Tala, Labi. Na kati ya hemoglobine, mwa bomoi oyo ebandaka kati na momboto, eutaka na mobali, pe ekotaka kati na mwasi. Pe mwasi azalaka na líki; kasi, nsoso ya mwasi ekoki kobota líki, kasi soki ezalaki esika moko na soso ya mobali te, líki yango ekototola mokolo moko te.”

¹⁴³ Pe nalobaki: “Bongo Nzambe, oyo aleki monene, oyo azalaki kotondisa ntango pe bisika nyonso, amikómisaki moke mpenza, momboto moke na libumu ya mwasi moko.” Pe na nsima nalobaki: “Ntango tobikisami lelo. . . Yesu azalaki Moyuda te, to Moto ya mabota te, mpo líki esalaka bebele mosuni. Makila nde ezalaki na Bomoi. Bongo to—tozali. . . Biblia elobi: ‘Tobikisami na Makila na Nzambe.’ Bomoni, Azalaki Moyuda te, to Moto ya mabota te; Azalaki Nzambe. Yango wana, ntango toyáka na etumbelo pe totiaka maboko na biso, na kondima, likolo na motó na Ye, toyokaka mpasi pe nsomo ya liwa na Ye na Gologota, pe toyambolaka masumu na biso, ete tokwei na likambo, pe ete Akufaki na esika na biso!”

¹⁴⁴ “Bongo, omoni,” nalobaki, “makila ya mwana na mpate kuna ekokaki kozonga likolo na ye te, makila oyo. . . Momboto epasukaki, pe bomoi oyo ekangolamaki, ntango momboto ya makila ya mwana na mpate yango epasukaki, ekokaki kozonga likolo na mosambeli te, mpo ezalaki bomoi ya nyama, pe ekokaki koyokana na bomoi ya moto te.”

¹⁴⁵ “Kasi mbala oyo, ntango momboto yango ya Makila epasukaki, ezalaki bebele moto te. Ezalaki Bomoi na Nzambe, nde ebimaki. Pe ntango mosambeli atii maboko na ye, na kondima, likolo na Mwana na Nzambe, pe ayamboli masumu na ye; ezali bomoi ya moto mosusu te, kasi Bomoi na Nzambe ekozonga kati na moto yango, yango ezali Bomoi na Seko. Ebiangeli Zoe, elingi koloba ‘Bomoi ya Nzambe Ye mei.’ Pe Alobaki Akopesa biso Zoe, Bomoi na Seko, pe lelo tozali bana mibali pe bana basi na Nzambe. Yango mpenza.”

¹⁴⁶ Nalobaki: “Sikawa, ezali nini? Ezali Nzambe, oyo azali komikitisa. Ayaki, liboso; ‘moto moko te akokaki kosimba Ye,’ mpo moto asumukaki. Nde, Akitaki kati na nzoto moko, ‘mpo na komeka lisumu. . . mpo na kozua lisumu.’ Bomoni, Ye, likambo moko kaka oyo Nzambe akoki kosala, mpo na kozala sembo, ezalaki nde kosala yango ndenge wana.”

¹⁴⁷ Ndakisa, nini elingaki kosalema soki nazalaki na bokonzi likolo na eyanganelo oyo na ntongo ya lelo, lokola oyo Nzambe azalaki na yango likolo na bato, pe nalobi: “Moto ya liboso oyo akotala likonzi wana, akokufa,” pe Tommy Hicks atali yango? Sikawa, ndakisa, nazui Carl-. . . “Ndeko Carlson, yo kufela ye.” Elingaki kozala sembo te. Nalingaki koloba: “Leo, ozali

sekretère na ngai; yo kufela ye.” Elingaki kozala sembo te. “Billy Paul, mwana na ngai, yo kufela ye.” Ezali sembo te. Lolenge moko kaka oyo nakoki kozala sembo, ezali ete ngai moko názua esika na ye.

¹⁴⁸ Pe yango nde oyo Nzambe asalaki. Ye, Nzambe, azali Molimo. Pe Asalaki. . . Ye, Abongolaki mosala na Ye. Esengelaki kozala likambo ya kokamwa, mpo na bato, kokanisa Yawe muana moke. Akokaki koya, lokola mobali oyo akoli, kasi Ayaki na elielo ya bibwele, likolo na matiti. Yawe muana moke, kolela lokola bebé. Yawe muana moke, kosakana lokola mwana mobali. Yawe muana moke, mosali na mabaya, lokola mosali. Yawe muana moke, elenge mobali. Yawe, atiami katikati ya likolo pe mabele, ná nsóyi ya balangwi masanga pe ya basoda na elongi na Ye. Yawe, kokufa mpo na bana na Ye. Yawe, kokufa, mpo na kosikola; moto mosusu te, kasi Nzambe Ye moko! Bomoni, Nzambe, ezalaki mosala na Ye. Mpo na nini? Azali koluka kozonga na motema na bato.

¹⁴⁹ Nzoka nde, tokokaki kosimba Ye te, *Kuna. Awa*, tosimbi Ye na maboko na biso. Sikawa, Asalaki nini, na nzela na mbeka ya nzoto wana? Akómaki Yawe *kati* na biso. Tozali biteni na Ye. Na Mokolo ya Pantekote, Likonzi na Móto Ekabwanaki na mbala moko, pe ndémo na Móto ekitelaki moto moko na moko, kolakisa ete Nzambe Azalaki komikabola kati na Lingomba na Ye.

¹⁵⁰ Bongo, bandeko, soki tokoki bobele kosangana, pe kosangisa Yango! Wana tozui Yawe na litondi, soki tosangani. Kasi tokosangana ndenge nini, ntango *songolo* azali koloba minoko na sika pe azali na libatisi, *pakala*; kasi tobateli ndémo na Móto *oyo* awa, pe *oyo*? Tosangisa Yango.

¹⁵¹ Na Mokolo na Pantekote, ntango Nzambe akitaki, Biblia elobi: “Ndémo na Móto efandaki na motó ya moto moko moko na kati na bango.” Pe bango. . . “Ndémo, lokola Móto,” ndémo. Ezalaki Likonzi na Móto wana, nde Ekabwanaki Yango moko pe Emikabolaki, kati na bato, mpo tózala bandeko. “Na mokolo yango, bino bokoyeba ete Ngai nazali kati na Tata, Tata kati na Ngai; Ngai kati na Ngai, pe bino kati na Ngai.” Pe, biso, tozali moko. Tozali moko, tokabwani te.

¹⁵² Sikawa, na likolo *Awa*, Yawe Nzambe akokaki kosimba bato te, na ntina na mobeko na Ye Moko ya bosantu; Yawe Nzambe akómaki lisumu mpo na biso, pe afutaki ntalo; mpo Yawe Nzambe yango moko akoka koya kofanda *kati* na biso. Nzambe *likolo* na biso; Nzambe *elongo* na biso; Nzambe *kati* na biso. Banzambe misato te; Nzambe moko kaka! Batei minene bazali kobela liboma, wana bazali koluka kososola Yango. Ezali—ezali likambo ya emoniseli. Esengeli komonisamela yo.

¹⁵³ Sikawa, sikawa, soki ekómi likambo ya libatisi, sikawa, bato mingi. . . Sikawa, bosengeli kosala bongo, bandeko. To, ezali ndenge nalobaki na Ndeko Scism pe na Ndeko Ness, ete soki

moto . . . Ko—Kowelana ebandaki. Pe moto nyonso, mingi kati na bato ya mayele mingi, oyo bozali awa, bozali na makoki mingi koleka ngai; kasi ngai nayekoli likambo yango mingi. Pe natangi buku ya Batata ya Liboso ya Nicée, Likita ya Nicée, ná bakomi nyonso ya masolo ya kala, pe bongo na bongo.

¹⁵⁴ Likambo yango balobelaki yango kuna na Likita ya Nicée. Ngámbo nyonso mibale ebótaki eloko malamumu ata moko te; ntango lingomba Katoliko bazuaki ngámbo ya bosato bosantu oyo eleki ndelo, pe oyo mosusu bamikómisaki ba-unitaire, pe ngámbo nyonso mibale bakendeke pembeni. Ya solo mpenza, mpo bato bazalaki na likambo ya kosala na kati.

¹⁵⁵ Bosengeli kotikela yango Nzambe, tozali na ntina ya koluka kososola yango te. Tózala bandeko. Tokende kaka liboso pe tótika Nzambe ásala likambo oyo Alingi kosala. Soki Azali na suka te pe Ayebi makambo nyonso, pe Akanisaki suka uta na ebandeli, ndenge nini biso tokoki kozala na likambo ya kosala mpo na yango? Bókoba bobele kokende liboso. Ndenge wana nde. Bókoba na etámبولи wana, ndenge nalobaki lobi na mpokwa, elongo na Yosua na biso monene.

¹⁵⁶ Sikawa botala, soki Banzambe bazali misato. . . Nalingi bobele kolakisa bino ndenge nini yango ezangi ntina. Soki banzambe bazali misato, boye Yesu azalaki oyo ya Ye Moko Tat- . . . Yesu akokaki kozala Tata na Ye Moko te, wana bazalaki moko. Pe, soki bazali misato, Abotamaki na mbotama ya mongondo te. Sikawa bato boni. . . [Ndeko Branham alimboli yango, asaleli biloko misato—N.D.E.] Nakobenga eloko *oyo* Nzambe Tata; *oyo* Nzambe Mwana; pe *oyo* Nzambe Molimo Mosantu.

¹⁵⁷ Sikawa, mpo na bandeko ndenge na ndenge oyo bozali awa, botala naino likambo oyo malamumu, nde bokomona oyo nazali koluka kotalisa. Nasengi ete Nzambe átalisa bino yango. Sikawa, botala, bino mibale bondimi ndenge moko, kasi Zabolo amikotisi kati na bino pe akaboli bino mpo na likambo yango. Ezali mpenza ndenge moko, pe nakotalisa bino yango polele, na lisungi ya Nzambe, pe na Biblia ya Nzambe. Soki ezali Biblia te, boye bondima yango te. Ya solo.

¹⁵⁸ Kasi sikawa botala. [Ndeko Branham alimboli yango, asaleli biloko misato—N.D.E.] *Oyo* (nini?) Nzambe Tata; *oyo* nde Nzambe Mwana; *oyo* nde Nzambe Molimo Mosantu. Bongo, sikawa, tótelema naino mwa moke sikawa, wana tozali kotia biloko yango misato kuna; Nzambe Tata, Mwana, pe Molimo Mosantu.

¹⁵⁹ Oh, na—nakozala na ntango ya kosala yango te. Ngai. . . [Bandeko balobi: “Koba na yo! Koba na yo!”—N.D.E.] Kasi, bomoni, ee, nakosala nokinoki mpenza. Bolimbisa ngai, bandeko na ngai, kasi na—na—nazuá naino libaku ya kosolola na bino te, pe—pe nalingi kosala yango.

160 Na bongo, botala; Nzambe Tata, Mwana, Molimo Mosantu. Sikawa, Nani azalaki Tata ya Yesu Klisto? Nzambe nde azalaki Tata ya Yesu Klisto. Bisó nyonso tondimi yango. Boye te? [Losambo balobi: “Amen.”—N.D.E.] Malamu.

161 Sikawa, soki tozui Matai 28:19, ntango Yesu alobaki: “Boye, bokende kozalisa bayekoli na mabota nyonso, kobatisa bango na Nkombo ya Tata, Mwana, Molimo Mosantu.” Nsima na mikolo zomi, Petelo alobaki: “Bobongola mitema, pe bobatisama na Nkombo na Nkolo Yesu Klisto.” Kotelemelana mpenza ezali na esika moko boye. Sikawa, tómeke te . . . ezali na . . .

162 Moto nyonso asílá kotatola, pe nyonso. Yango oyo. Boyambi na ngai yango oyo, pe nazali bobele kotalisa yango polele liboso na bino, bandeko. Nalobaka yango na biteyelo te; etali bino. Kasi nalingi kolakisa bino eloko ngai namonaka na ngámbo nyonso mibale, mpo Molimo Mosantu amonisa bino yango, bomoni.

163 Sikawa, Matai 28:19, pe soki—soki Matai 28:19 ezali kotelemela Misala 2:38, elingi koloba kotelemelana ezali na kati na Biblia, pe Ezali ata na motuya ya lokasa oyo bakomeli Yango te.

164 Sikawa, soki botali malamau na Matai, mokapo ya 16, Yesu apesaki Petelo emoniseli, pe Apesaki ye mafungola.

165 Sikawa, bobosana te, Biblia emonisamaka te na likindo ya mwango oyo bato babongisi. Ezali bongo te. Ezali emoniseli.

166 Ezalaki emoniseli, mpo na kobanda. Mpo na nini Abele apesaki Nzambe mbeka ya motuya koleka oyo ya Kaina? “Emonisamelaki ye,” ete ezalaki ba-mbuma ya pêche te, ba-póme te, malálá te, ba-póme pe te. Soki ba-póme ekoki kosala ete basi básosola ete bazali bolumbu, malamau tópesa bango lisusu ba-póme, ndeko. Omoni bongo te? Sikawa, yango, emonani lokola kotúka, kasi ezalaki mposa na ngai te. Kasi, ezalaki ba-póme te. Te, misie. Sikawa, pe soki ezali bongo, boye, “Emonisamelaki Abele,” ete azalaki makila ya tata na ye. Na bongo, apesaki mbeka ya makila, mpo ezalaki emoniseli. Likambo mobimba etongami likolo na yango.

167 Sikawa botala, mobange molobi mbisi oyo azali moínga, atángá mpenza te. . . Biblia elobi ete azalaki moínga pe akota kelasi te. Kasi azalaki wana, pe Yesu atunaki motuna: “Bolobaka Ngai Mwana na moto nazali nani?”

168 Moko alobaki: “Ee, Ozali—Ozali Mos- . . .” To, “Ba—balobaka: ‘Ozali Mose.’”

“Bango balobi, balobaka ete Ngai Nazali Nani?”

Moko alobaki: “Ee, Ozali Yilimia to basakoli, pe *oyo*, *oyo kuna*, to *oyo mosusu*.”

169 Alobaki: “Motuna yango wana te. Natuni nde *bino*. Bino bolobaka ete Ngai nazali Nani?”

170 Pe Petelo atatabanaki te, pe alobaki: “Ozali Mwana na Nzambe.”

171 Pe Alobaki: “Esengo na yo, Simona, mwana na Yona.” Sikawa, botala malamau. “Mosuni pe makila emonisi yo yango te, kasi Tata na Ngai oyo azali na Likolo.” Bomoni?

172 Sikawa, botala malamau, sikawa, lingomba Katoliko balobaka ete Atongaki Lingomba likolo na Petelo. Ezali lokuta.

173 Lingomba ya ba-Misioni balobaka: “Atongaki yango likolo na Ye moko.” Kasi sikawa botala malamau mpo boyeba, bomona soki ezali bongo.

174 Atongaki yango likolo na emoniseli ya molimo ya Nani Ye azali, bomoni, mpo Alobaki: “Esengo na yo, Simona, mwana na Yona. Mosuni pe makila emonisi yo yango te. Nalobi ete ozali Simona; likolo na libanga yango” (libanga nini? emoniseli) “Nakotonga Lingomba na Ngai, pe bikuke na ewelo ekoki kelonga liboso na Yango te.” [Ndeko Branham abeti likolo na eteyelo mbala misato—N.D.E.]

175 Bongo, ntango Petelo azalaki wana, ntango Matai 28 elobamaki, abaluki pe, nsima na mikolo zomi, ná emoniseli yango, abatisaki na Nkombo na “Nkolo Yesu Klisto.” Mpo na nini asalaki bongo? Azalaki na emoniseli ya Nzambe; pe azalaki na mafungola ya Bokonzi, ndeko.

176 Sikawa, ntango mosusu nakoyokisa bino mitema mpasi na mwa ntango moke, ngámbo moko na kati na bino, kasi botelema mwa moke. Esika ata moko ezali te, na Biblia, oyo moto moko azuá libatizi na Nkombo ya “Tata, Mwana, Molimo Mosantu.” Esika ata moko ezali te, na Makomi. Soki ezali, bolakisa yango. Pe soki bomoni yango ata na esika nini kati na lisituálé ya bulée, liboso ete lingomba Katoliko ésalema, nalingi ete bólakisa yango. Esika moko ezali te, nde, pe ya solo.

Kasi sikawa, bozela naino mwa moke, bino ba-Unitaire.

177 Sikawa, na esika moko te. . . Soki moto moko akoki kolakisa ngai eteni moko mpamba ya Likomi, epai wapi molulu wana esalemaki na kati na Biblia, ya “Tata, Mwana, Molimo Mosantu,” botindami koya koyebisa ngai esika nini moto abatisamá ndenge wana.

178 Pe bamosusu kati na bango balobaka: “Ee, ngai nakozua oyo Yesu alobaki, kasi oyo Petelo alobaki te.” Soki bazalaki na kotelemelana, moko na mosusu, tokosala nini? Soki Biblia mobimba ezali Nzambe te, ngámbo na yango nini ezali malamau?

179 Esengeli kokutana pe kosangana na mobimba, pe ezali bobele emoniseli ya Nzambe. Biteyelo na biso ekolakisa yango mokolo moko te. Ezali emoniseli, ete bosengeli komona Yango.

180 Boye, soki bato mibale wana bazalaki na kotelemelana, moko na mosusu, boye totangaka Biblia ya ndenge nini? Nakoyeba ndenge nini soki Yoane 14 ezali solo to te? Nakoyeba ndenge nini

soki Yoane 3 ezali solo to te? Nakoyeba ndenge nini, ndenge nini, ndenge nini? Bomoni?

¹⁸¹ Kasi lolenge bobele moko nakoki kondimela Nzambe, ezali koyeba ete Biblia oyo ezali solo, pe kondima ete Ezali solo, pe kokangama na Yango. Ata nasosoli Yango te, nakosalela Yango kaka.

¹⁸² Kasi ntango kotelemelana oyo eyaki, bongo nabelemaki liboso na Nzambe, mpo náyeba. Pe Mwanje moko oyo akutanaka na ngai na liyangani, pe na butu, Ye Moko nde alakisaki ngai likambo Yango. Bomoni? Sikawa, botala soki likambo oyo, lolenge ezali sikawa.

¹⁸³ Sikawa, Matai 28:19, totala sikawa malamau mwa moke. Pe sikawa, nakozua Misala 2:38 bobele awa, esika Petelo alobaki: “Nkolo Yesu Klisto.” Pe Matai alobaki: “Tata, Mwana, Molimo Mosantu.”

¹⁸⁴ Sikawa, boyoka. Alobaki: “Bóbatisa bango . . .” Ezali te “na nkombo ya Tata, na nkombo ya Mwana, na nkombo ya Molimo Mosantu.” Alobaki bongo te. “Nkombo . . . na nkombo . . . na nkombo” ezali te.

¹⁸⁵ Alobaki te: “Bobatisa bango na *bankombo* ya Tata, Mwana, pe Molimo Mosantu,” mpo ezali ata na ntina te.

¹⁸⁶ Alobaki: “Bobatisa bango na Nkombo (N-k-o-m-b-o) ya Tata, Mwana, pe Molimo Mosantu.” Boye te? [Losambo balobi: “amen.”—N.D.E.] “. . . ya Tata, Mwana, pe Molimo Mosantu,” likangisi, “pe, pe, pe.”

¹⁸⁷ Ezali te “bankombo.” Ezali te “na nkombo ya Tata, nkombo ya Mwana, nkombo ya Molimo Mosantu.” Ezali te, “na *bankombo* ya Tata, Mwana, pe Molimo Mosantu.” Kasi, “na Nkombo,” N-k-o-m-b-o, na bomoko, “ya Tata, Mwana, pe Molimo Mosantu.” Sikawa, nkombo oyo wapi kati na yango esengeli, mpo na kobatisa na yango? Ezali Nkombo kaka moko. Ezali oyo wapi? “Tata” nde nkombo oyo esengeli, to “Mwana” nde nkombo oyo esengeli, to “Molimo Mosantu” nde nkombo oyo esengeli?

¹⁸⁸ Ezali “Nkombo” moko, na esika moko boye. Boye te? [Losambo balobi: “Amen.”—N.D.E.] Ee, bongo, nalingi kotuna bino likambo moko sikawa. Soki “Nkombo” yango, bongo, soki Yesu alobaki, “bobatisa bango na Nkombo ya Tata, Mwana, pe Molimo . . .” Bato boni bandimi ete Yesu alobaki bongo? [“Amen.”] Oyo wana nde Makomi. Ezali Matai 28:19, “Na Nkombo ya Tata, Mwana . . .”

¹⁸⁹ [Ndeko Branham amoni eloko moko oyo ebendi makanisi pembeni—N.D.E.] Ezali nde eloko moko oyo biso . . . Te, ezali, nakanisaki . . . Malamau, misie. [Ndeko mobali moko alobi: “Limbisa ngai, Ndeko Branham?”] Iyo. [“Nalingi kobalola nde

bande oyo, pe nalingi kozanga yango te.”] Malamu. [Eteni oyo ezangi maloba na bande.] . . . ? . . .

¹⁹⁰ Sikawa, “na Nkombo ya Tata, Mwana, pe Molimo Mosantu.” Sikawa boyoka, bandeko. “Tata” lokola nkombo ezalaka te, mpo ete *Tata* ezali nkombo te. Ezali ebiangelo. “Mwana” lokola nkombo ezalaka te, mpo ete *Mwana* ezali ebiangelo. “Molimo Mosantu” lokola nkombo ezalaka te. Ezali oyo Ye azali.

¹⁹¹ Nazalaki koloba yango na ntongo moko, ntango ya kolia na likita ya batei, pe mwasi moko. . . Na ntembe te, moto nyonso oyo akobulunganisa likambo ya ndenge wana azali libanda ya molongo. Mwasi yango alobaki: “Zela mwa moke! Limbisa ngai!” Alobaki: “Molimo Mosantu ezali nkombo.”

¹⁹² Nalobaki: “Ezali nde oyo Yango ezali. Ngai nazali moto, kasi nkombo na ngai ‘Moto’ te.”

¹⁹³ Ezali Molimo Mosantu. Yango ezali nkombo te. Ezali nde oyo Yango ezali. Ezali ebiangelo, na ntembe te, kasi ezali te. . . Ezali—ezali. . . Ezali nkombo te.

¹⁹⁴ Sikawa, soki Alobaki: “Bobatisa bango na Nkombo ya Tata, pe ya Mwana, pe ya Molimo Mosantu,” pe Tata, to Mwana, to Molimo Mosantu, ezali nkombo te, Nkombo yango ezali nini kasi? Tozali na mposa ya koyeba.

¹⁹⁵ Sikawa, tokoki kozua yango nyonso na esika moko awa, soki bolandi na bokebi pe—pe—pe kosalela mwa ntango, to, nalingaki koloba, kobatela mwa ntango. Sikawa, botala Matai 28:19. Sikawa, nalobi te ete. . .

¹⁹⁶ Mbala mosusu, ntango mosusu bosálá yango, bamosusu kati na bino, bandeko basi to mibali. Ntango mosusu olokotaki buku moko, mokolo moko, pe otalaki na suka na yango, pe bakomáki: “Yoane ná Malia babikaki na esengo banda wana.” Ee, Yoane ná Malia nde banani? Nini yango, Yoane ná Malia, oyo babikaki na esengo banda wana, nde banani? Mpo óyeba soki Yoane ná Malia nde banani, nzela ezali bobele moko; elingi koloba, soki ezali libombami mpo na yo, zongela kotanga buku yango. Boye te? [Losambo balobi: “Amen.”—N.D.E.] Zonga na ebandeli pe tanga yango kino na suka, pe ekoyebisa yo soki Yoane ná Malia bazali banani.

¹⁹⁷ Ee, soki Yesu alobaki, Yesu Klisto Mwana na Nzambe, oyo alobaki: “Boye, bokende kozalisa bayekoli na mabota nyonso, kobatisa bango na Nkombo ya Tata, Mwana, pe Molimo Mosantu,” pe *Tata*, *Mwana*, to *Molimo Mosantu* ezali nkombo te. Boye, soki ezali libombami, malamu tózonga na ebandeli ya Buku.

¹⁹⁸ Sikawa, tózonga na mokapo ya 1 ya Matai, pe tokobanda wana, epesi mabota, kino kokóma na nzela ya 18.

¹⁹⁹ Sikawa botala malamu, sikawa botala naino mwa moke. [Ndeko Branham alimboli yango, asaleli biloko misato—N.D.E.]

Oyo nde Tata, na loboko na ngai ya mobali; *oyo* na katikati nde Mwana; pe *oyo* nde Molimo Mosantu. Sikawa, *oyo* nde Tata ya Yesu Klisto. Boye te? [Losambo balobi: “Amen.”] Nzambe azali Tata ya Yesu Klisto. Bisu nyonso tondimi yango? [“Amen.”] Malamu.

200 Sikawa, Matai 1:18 elobi:

Kobotama na Yesu Klisto ezalaki boye: Esili . . . Malia, mama na ye, kobandama na Yosefe, kasi liboso ete ye . . . bafanda ndako moko, azuaki zemi moko na nguya ya . . .

201 [Losambo balobi: “Molimo Mosantu.”—N.D.E.] Ngai nakanisaki ete Nzambe nde Tata na Ye.

Akobota mwana mobali, . . . bango kobenga ye YESU: . . .

Pe mobali na ye Yosefe, azalaki moto na boyengebene, . . . aboyaki komonisa ye nsoni na miso na bato, kasi akani kolongola ye na nkuku.

Na bongo, ezalaki ye kobanzabanza bongo, tala, mwanje na Nkolo amonani na ye na liloto, alobi, Yosefe, mwana na Dawidi, banga kokamata Malia mwasi na yo te: zambi zemi oyo azali na yango, euti na nguya ya . . .

202 [Losambo balobi: “Molimo Mosantu.”—N.D.E.] Nakanisaki ete Nzambe nde Tata na Ye. Sikawa, bandeko, Azali na batata mibale? [“Te.”] Soki moke te. Soki bongo, Alingaki kozala mwana makango, boye tolingaki kozala na losambo ya lolenge nini? Bosengeli kondima ete Nzambe Tata ná Molimo Mosantu, bazali bobele Molimo moko. Solo, Ezali bongo. Solo, Ezali bobele Molimo moko. Sikawa, tosilisi, pe tomoni yango.

Akobota mwana mobali, pe bango bakobianga nkombo na ye YESU: mpo ye akobikisa bato na ye na lisumu na bango.

. . . oyo mobimba esalemaki mpo na kokokisa . . .

203 Nazali kotanga Likomi. Bino batei boyebi, wana nazali kotanga.

. . . mpo na kokokisa . . . mosakoli alobaki, na nzela na Nkolo, ete,

. . . ngondo akokumba zemi, pe . . . kobota mwana, pe bakobianga nkombo na ye Emanuele, oyo ndimbola . . .

204 [Ndeko Branham apemi. Losambo balobi: “Nzambe elongo na biso.”—N.D.E.] “Nzambe elongo na biso!” Boye te? [“Amen.”]

205 Boye, Nkombo ya Tata, Mwana, Molimo Mosantu ezali nani? [Ndeko mobali moko alobi: “Yesu Klisto.”—N.D.E.] Ee, ya solo. Yango wana Petelo abatisaki bango na Nkombo na “Yesu Klisto.”

206 Kasi, ata soki obatisamaki na nkombo ya Rose ya Saron, Lísi ya Lobwaku, Monzoto ya Ntongo, yango pe ezali bibiangelo.

Soki motema na yo ezali sembo mpo na Nzambe, Ye ayebi motema na yo.

²⁰⁷ Kasi nde, sikawa, nalobaki bongo. Boye, sikawa, nalobaki. . . Bongo, Ndeko Scism alobaki: “Sikawa!” Ya solo, na ntembe te, ezalaki lokola likambo ya ba-Unitaire, bongo andimaki yango mpenza.

²⁰⁸ Bongo, nalobaki: “Sikawa, awa, nalingi koyebisa bino likambo moko, sikawa.” Bomoni? Nalobaki: “Sikawa nalingi kotalisa bino polele ete mibali oyo, bango mibale, balobaki ndenge moko.”

²⁰⁹ Sikawa, Matai alobaki: “Na nkombo ya Tata.” Boye te? [Losambo balobi: “Amen.”—N.D.E.] Malamu. Pe Petelo alobaki: “Na Nkombo na Nkolo.” Matai 28:19 elobi: “Na nkombo ya Tata,” pe Misala 2:38 elobi: “Na Nkombo na Nkolo.” Dawidi alobaki: “Nkolo alobaki na Nkolo na ngai.” Ezalaki Nani? Tata pe Nkolo ezali bobele Nkombo moko. Dawidi alobaki: “Nkolo alobaki na Nkolo na ngai: ‘Fanda na loboko na Ngai ya mobali.’” Bomoni: “Na Nkombo ya Tata; na Nkombo ya Nkolo.”

²¹⁰ Pe Matai alobaki: “Na Nkombo na Mwana,” pe Petelo alobaki: “Na Nkombo na Yesu.” Mwana nde Nani? Yesu.

²¹¹ “Na Nkombo ya Molimo Mosantu,” nde Matai; pe Petelo alobaki: “Na Nkombo na Klisto,” Logos.

²¹² *Tata, Mwana, Molimo Mosantu*: “Nkolo Yesu Klisto.” Kasi, ebongi mpenza be na ndenge ekoki. Bomoni?

²¹³ Ndeko Scism alobaki na ngai. Ndeko Scism, ndeko mobali oyo ya Unitaire, alobaki: “Ndeko Branham, ezali ya solo, kasi,” alobaki, “oyo kuna yango *oyo*.”

²¹⁴ Nalobaki: “Boye, oyo yango *kuna*.” Ya solo. Bomoni? Nalobaki: “Soki oyo kuna yango *oyo*, oyo yango *kuna*. Bongo, mpo na nini bozali kowelana?”

²¹⁵ Nalobaki: “Botika ngai napesa bino ntoli, bandeko. Soki nasengeli kobatisa moto, botala ndenge. . .”

²¹⁶ Nalobaki: “Sikawa, Docteur Ness ye oyo.” Pe, eleki mwa ntango, ndeko moko kati na bino alobaki ete boyebi Docteur Ness.

²¹⁷ Ee, awa, nakoloba, Ndeko Hicks oyo, azali na. . . Nakanisi ete ozali na lipolome ya Docteur. Boye te? Malamu.

²¹⁸ Bongo, nalobaki: “Soki Docteur Ness, oyo afandi awa. . .” Pe nalobaki: “Soki nalingaki. . .” Nzoka nde, ntango namemaka moto na mai, mpo na kobatisa ye, nasosolaka yango lokola ye, nalobaki: “Oyo wana ezalaki bibiangelo oyo elongobanaki na Nkombo na Ye.”

²¹⁹ Nalobaki: “Sikawa, bandeko ya ba-Assemblée basalelaka bibiangelo, pe bandeko ya Unitaire basalelaka Nkombo.” Nalobaki: “Sikawa, nakotalisa bino, ete bino mibale bokwei, pe

ngai nde nalongi.” Boyebi ndenge bosengeli . . . Soki bato bazali na motema likolo, osengeli kosekisa bango mwa moke, mpo na kokitisa bango motema. Bongo nalobaki: “Nakotalisa bino ete bino mibale bokwei, pe ngai nalongi.”

²²⁰ Nalobaki: “Sikawa, soki nalingaki komemia Ndeko Ness, nalobi . . .”

²²¹ To, to Ndeko Hicks oyo, bomoni. Nalobi: “Hicks!” Ekozala malamumu? Te. Ee, bongo soki nalobi: “Docteur! Eh, Doc! Ndenge nini?” Wana, ezali kozanga limemia, boye te?

²²² “Ntango,” nalobaki, “bino ba-Assemblée, bosalaka nde bongo, bomoni. Ntango bino bandeko ya ba-Assemblée, bolobaka: ‘Na nkombo ya Tata, pe ya Mwana, pe ya Molimo Mosantu,’ bolobaka nde, ‘na nkombo ya reverend, docteur.’”

²²³ Pe nalobaki: “Bongo, bino bandeko ya Unitaire, ntango bobatisaka, bolobaka: ‘Yesu!’” Bango basalelaka te . . .

²²⁴ Bango, ba-Yesu Kaka, basalelaka bobele nkombo “Yesu.” Ba-Yesu bazali ebele. Kasi, Ezali nde Nkolo Yesu Klisto, bomoni. Bazali ebele . . . Kobatisa na nkombo na “Yesu,” solo, nandimaka yango te; Likomi ezali te. Bozua oyo ya ebandeli, botala soki ezali te “Nkolo Yesu Klisto.” Na ntembe te, Azali Nkolo Yesu Klisto. Ba-Yesu bazali ebele, na ntembe te. Pe *Klisto* elakisi “Mopakolami.”

²²⁵ Nalobaki: “Sikawa, soki nasengeli koloba ndenge moko epai ya ndeko Ness. Nakoki koloba, ekozala malamumu soki nalobi: ‘Eh, Ness!’?” Nalobaki: “Bino ba-Unitaire bolingaki koloba yango ndenge wana. Bomoni? Elingaki kozala mpenza kozanga limemia epai na mobali wana oyo atángá, pe azali na Lipolome ya Docteur, boye te? Soki atángá mingi mpo na kozua yango, esengeli ete bapesa ye lopete wana.”

²²⁶ Pe nalobaki: “Bongo soki nalobi: ‘Eh, Doc!’” Nalobaki: “Ezali elobeli ya makasi, soki motei alobeli moninga na ye motei ndenge wana, boye te?” To, nalobaki: “Ezali mpenza ndenge bino bosalaka yango, kasi nde na pembeni, na bibiangelo.”

²²⁷ Kasi nalobaki: “Ntango namemaka moto na mai; nakopusana wana pe natuni ye, pe nalobi, pe natuni nkombo na ye pe nani ye azali, pe kondima na ye.”

²²⁸ “Na nsima nabondeli, pe nalobi: ‘Sikawa, Tata, ndenge Otindaki biso ete “tókende na mokili mobimba pe tózalisa bayekoli na mabota nyonso, . . .”” Bandeko, boyebi ete yango nde oyo ya ebandeli, bomoni. “ . . . tózalisa bayekoli na mabota nyonso, tóbatisa bango na Nkombo ya Tata, pe ya Mwana, pe ya Molimo Mosantu; tólakisa bango ete bátosa nyonso esili Yo . . . nyonso esili Yo kolakisa biso.””

²²⁹ “Na nsima, nalobi: ‘Likolo na eyamboli ya kondima na yo; likolo na eyamboli ya masumu na yo, pe ya kondima na yo

epai na Mwana na Nzambe, nazali kobatisa yo, ndeko na ngai molingami, na Nkombo na Nkolo Yesu Klisto.”

²³⁰ Nalobaki: “Ngai nabatisaka nde ndenge wana. Nandimaka mbala moko bibiangelo na Ye, oyo Ye azalaki, mbala moko Tata, Mwana, pe Molimo Mosantu. Pe ntina oyo Yesu alobaki bongo, ezali . . .”

²³¹ Sikawa, botala. Soki—soki ezali bongo te, bozali na kotelemelana kati na Makomi na bino; bozali na kotelemelana. Bongo bokosala nini ntango . . . Bongo soki ndeko wana ya Boudda atelemaki mpo na koloba: “Olobi nini mpo na likambo *oyo*?” Bango balingaki koloba nini ntango balobaki na ngai . . .

²³² Kuna, ntango ndeko Indien wana abetaki mɔ́ndengé na Morris Reedhead, alobaki na ye, alobaki: “Olobi nini mpo na Malako 16?” Asengelaki komibenda mpo na yango.

²³³ Ozali na ntina ya komibenda te mpo na likambo soko nini. Ezali Liloba na Nzambe. Kangama na Yango. Bondela kaka. Zua emoniseli. Ezali ndenge moko longua na ebandeli kino na suka.

²³⁴ Bomoni, sikawa, bango mibale bazalaki koloba likambo yango; bibiangelo te; na polele te. Nalobaki: “Sikawa . . .”

²³⁵ Nandimeli Ye. Azalaki Tata; Nzambe mosusu te. Azalaki Mwana; Nzambe mosusu te. Kaka Nzambe yango! Bino . . . Ezali nde misala misato. Nzambe kati na eleko ya Botata, soki bolingi kobenga yango bongo, ya Botata; ya Bomwana; pe ezali bobele Nzambe yango kati na biso sikawa, “Ngai nakozala elongo na bino.” “Ngai,” likitani bomei, “Ngai nakozala elongo na bino.” Boye, bomoni, ezali misala misato, kasi Banzambe misato te.

Sikawa, ndeko, soki bayekoli basalelaki yango te, pe bongo na bongo . . .

²³⁶ Naboi yango te. Ezali mabe te. Boyoka, soki moto moko ayei awa, oyo azuaki libatisi na nkombo ya “Fololo ya Saron, Lísi ya Lobwaku, pe Monzoto ya Ntongo,” pe andimeli Yesu Klisto lokola Mobikisi na ye; nakoloba: “Nzambe apambola yo, ndeko! Yaka, tokende!” Bomoni? Ya solo. Mpamba te, soki motema na yo ezali sembo te, ozali pe na bosembo te, ata boni. Ya solo mpenza. Pe motema na yo—na yo esengeli kozala sembo.

²³⁷ Pe nalobaki: “Sikawa botala. Sikawa, soki nalingi kopesa Ndeko Ness mbote awa, nakoloba ‘Moto na lokumu Docteur Ness.’ Ya solo. Azali motei. Basengeli kozua ye lokola moto na lokumu. Atángá, pe atángá mingi. Azali na Lipolome ya Docteur, na bongo basengeli kobenga ye ‘docteur’. Yango nde ebiangelo na ye, bomoni. Nzoka nde nkombo na ye ‘Ness’. Kasi nakoloba te: ‘Eh, Ness! Eh, Doc!’ Te, ekozala malamau te. Nakoloba: ‘Moto na Lokumu Docteur Ness.’”

²³⁸ “Bomoni, yango nde nazali kolobela, bomoni, oyo Ye azali; na mbala moko Tata, Mwana, pe Molimo Mosantu, ‘Nkolo Yesu Klisto.’” Bomoni?

239 Pe nalobaki: “Soki mokolo moko nabatisi mondimi moko ya ba-losambo na bino, nakobatisa ye nde bongo.” Nalobaki: “Okoyamba ye, Ndeko Ness?”

240 Alobaki: “Ya solo. Abatisami na Nkombo ya Tata, Mwana, pe Molimo Mosantu.”

Nalobaki: “Okoyamba ye, Ndeko Scism?” Alobaki: “Na ntembe te, abatisami na Nkombo na Yesu.”

241 Nalobaki: “Bongo, likambo na bino nini, bandeko? Mpo na nini bondimi yango te, mpo na kobuka bitutu oyo, epai bato wana bazali. Ba-Unitaire bazali na mposa, mpenza, bandimi ya ba-losambo na bango, bazali na mposa ya kosambela elongo na baoyo ya ba-Assemblée. Pe ba-Assemblée, bandimi ya ba-losambo na bango, bazali na mposa ya kosambela elongo na baoyo ya ba-Unitaire. Pe bandeko bazali ndenge wana. Bazali ndenge wana. Kasi na ntango nyonso oyo Zabolo akoki kobundisa bango. . . .”

242 Sikawa, bomoni oyo nalingi koloba, bandeko? Nazali kolanda ntina bobele moko, Yesu Klisto, pe bomoko ya Nzoto na Yesu Klisto. Yango nde ntina nazali kolanda. [Losambo balobi: “Amen.”—N.D.E.]

243 Sikawa, nalobeli te likambo ya: “Eh, soki ozui libatisi na Nkombo na Yesu te; okokende na lifelo.” Oyo wana, ezali bolema.

244 Nakoyebisa bino likambo oyo esalemaki mokolo wana. Nazalaki na Texas. Liboso nálongwa. . . .Pe ba—bandeko oyo bazali banzeneneke na likambo yango. Lingomba ya ba-Unitaire, ba-losambo ntuku nsambo na mibale, bapesaki misolo mpo na kosunga liyangani na ngai. Pe nafandisaki Ndeko Petty, ndeko moko ya ba-Assemblée de Dieu, na etumbelo na mpokwa wana. Sikawa, boyebi ete ezali ya solo. Azali ndeko moko ya motuya, Ndeko Petty, soki bamosusu kati na bino bayebi ye, ya Beaumont, na Texas. Azali moko na bato ya malam koleka oyo nakútáná na bango. Mwasi na ye azali mo-Katoliko oyo abongoli motema, mwasi mosantu mpenza. Mobali yango azali mpenza moto na Nzambe.

245 Boyebisa ngai nani azali moto malam koleka Roy Wead, ya ba-Assemblée de Dieu. Botangela ngai moko na bandeko oyo, botala awa, bandeko nyonso oyo nayebi awa. Ndeko oyo ya lingomba ya Philadelphie, ná bato ya ba-Assemblée de Dieu, pe, banani bazali malam koleka bango? Boyebisa ngai bazali wapi. Boyebisa ngai nani azali malam koleka Jack Moore? Boyebisa ngai. Azali oyo babengaka. . . .Bazali bato na bango. Alekisaka ndelo te. Na ngambo nyonso mibale, baoyo balekisaka ndelo bazali; na yango nde bato balakisaka misapi, na yango nde Zabolo pe alakisaka mosapi.

246 Kasi bango nyonso bazali bato na Nzambe. Nzambe apesi bango Molimo Mosantu. Soki ngolu na Nzambe te, nde mawa

mpo na biso nyonso, ná kowelana na biso pe makambo mosusu. Ya solo mpenza. Kasi ngolu na Nzambe esangisi biso. Kokamwa te ete tokoka koyemba: “Ekanganelo oyo esangisi mitema na biso kati na bolingo na Klisto épambolama.” Na bongo, tosengeli nde na yango.

²⁴⁷ Na bongo, boyebi? Pe Moyangeli Mokonzi ya li—lingomba, abengaki ngai, pe alobaki: “Oyebi likambo oyo osalaki lobi na mpokwa?” Na mpokwa ya mibale oyo nazalaki kuna.

Nalobaki: “Likambo nini?” Nalobaki: “Liyangani ezalaki malamau mpenza.”

Alobaki: “Na eteyelo na yo, obengisaki mobali moko ya mosumuki.”

Nalobaki: “Nayebaki yango te.” Esika nini . . .

Alobaki: “Misie Petty wana.”

²⁴⁸ “Oh,” nalobaki, “mosumuki? Nini?” Nalobaki: “Azali motei ya ba-Assemblée de Dieu, ndeko.”

²⁴⁹ Alobaki: “Iyo, kasi azali kaka mosumuki ata bongo, mpo azui libatishi na ndenge oyo esengeli te.”

²⁵⁰ Pe nalobaki: “Ndeko, nasengi yo oyebisa ngai ntina.” Nalobaki: “Azali na Molimo Mosantu.”

²⁵¹ Alobaki: “Ndeko Branham, Petelo alobaki nini? ‘Bobongola mitema, pe bobatisama na Nkombo na Yesu Klisto mpo na kolimbisama na masumu na bino.’ Boye, masumu ya moto ekoki kolimbisama te soki naino azui libatishi na Nkombo na Yesu te.”

Nalobaki: “Esalemaka nde bongo, ndeko na ngai?”

Alobaki: “Esalemaka bongo.”

²⁵² Nalobaki: “Boye, Nzambe abúlunganisaki mwango na Ye Moko, na Misala 10:49, mpamba te: ‘Naino ezalaki Petelo koloba makambo oyo, Molimo Mosantu akitaki likolo na baoyo bazalaki koyoka Liloba,’ bomoni, kasi bazuaki naino ata libatishi te. Boye, Nzambe apesaki Molimo Mosantu na baoyo babongwanaki ata te?” Nalobaki: “Na bongo otelemi wapi sikawa?”

²⁵³ Alobaki: “Oyebi eloko tokosala?” Alobaki: “Tozali kosala mwa libungutulu, pe tokotia yo libanda na libungutulu na biso.”

²⁵⁴ “Bongo,” nalobaki, “ngai nakosala mosusu, pe nakozongisa bino na kati.” Nalobaki: “Bokoki kotia ngai libanda te, mpo nalingaka bino. Bomoni, bokoki kosala bongo te, te.” Nalobaki: “Bandeke na bino—na bino mingi koleka, kuna, balingaka ngai pe bandimelaka ngai.” Nalobaki: “Bino, ngai nako—nako . . . Bakoya, ata bongo.” Nalobaki: “Bakoya. Pe bokoki kotia ngai libanda te. Soki botii ngai libanda, ngai nakozongisa bino na kati.” Nalobaki: “Soki bosali libungutulu moko; Nzambe, na ngolu na Ye, akopesa ngai nzela ya kosala mosusu, pe nakobenda bino bozonga na kati.” Ya solo, kosala mosusu mpo na kozongisa bango na kati.

²⁵⁵ Pe, ndeko, oh, na Nkombo na Klisto, tika ete naloba yango. Na—nazali na . . . nayebi ete nazui ntango molai awa; pe ekómi toloba ngonga mpenza ya kosukisa, nabanzi, kasi botika naloba yango, bomoni.

²⁵⁶ Pe nalobaki na mobali wana, nalobaki: “Nakozala na boyokani na yo, na ntango nyonso oyo okoteya Makomi, pe oyo okozala na bolingo, pe oyo okondima ete—ete . . . pe oyo okoteya pe okoloba ete ozali kobatisa bato . . . na nkombo na ‘Yesu’ te, Yesu kaka. Te, misie. Na—nakondima yango ata moke te, mpo nayebani na ba Yesu ebele; nayebi bango na Afrika pe na bisika ndenge na ndenge, bato na nkombo Yesu. Kasi soki osaleli nkombo ya ‘Nkolo Yesu Klisto,’ wana, nakozala na boyokani na yo. Ezali malamum mpenza. Nakosunga yo. Nakanisi bosengeli liboso kotia ‘Tata, Mwana, pe Molimo Mosantu,’ bomoni, mpo ézala polele.” Nalobaki: “Nakanisi ete bosengeli kosala bongo.”

Kasi alobaki: “Oh, te, te! Wana, ezongi na bosato bosantu.”

Nalobaki: “Ezali bosato bosantu te. Ezali Nzambe moko na misala misato.”

²⁵⁷ Ezali bosato te, Banzambe misato. Tozali na Banzambe misato te. Ezali bongo te. Likambo na boye ezalaka te. Eteyama na Biblia te. Pe Nzambe azali bobele moko. “Yoka, e Yisalaele, Nazali Yawe Nzambe na yo.” Nzambe moko! Mobeko ya liboso: “Okozala na banzambe mosusu liboso na Ngai te.” Na ntembe te, Azali Nzambe bobele moko, misato te.

²⁵⁸ Oyo wana, ezali ndimbola ya ba-Katoliko; pe eutaki epai na ba-Katoliko pe elekaki epai na ba-Lutherien, pe ekobaki, pe bongo na bongo, pe bato mingi bakómi kondima lelo ete tozali na Banzambe misato.

²⁵⁹ Pe na esika wana nde, ata mokolo moko te, bino boko . . . Nsango Malamu wana ekobonga te mpo na Bayuda . . . Yango nde nasakolaki, mokolo wana na ntongo, epai ya ntoma moko Moyuda kuna. Mokolo moko te okondimisa Moyuda ete Banzambe bazali misato. Okokoka te. Kutu, azali te; ayebi yango malamum koleka. Bomoni, mpo na likambo wana, ayebi Biblia malamum koleka. Kasi Azali Nzambe misato te, mpo—mpo na Moyuda. Soki oyebisi ye ete Azali bobele Jehovah wana, akondima yango nokinoki. Ya solo! Ezali bongo, bomoni.

²⁶⁰ Pe nandimaka nyonso oyo. Ndenge Yosefe alobaki: “Bandeko, kosilika te, mpo Nzambe moto asalaki yango,” bomoni. Mpamba te—mpamba te likambo oyo . . . Mpo ézala kino lelo, esili, mpo ete eleko na biso bato ya Mabota ekómi mpenza pene na kosila. Bongo, nandimaka yango, na motema na biso mobimba. Boye, bomoni, bandeko na ngai? [Losambo balobi: “Amen.”—N.D.E.] Nazali koluka kokóma na likambo moko, ete, etonga ya bato oyo, ya mibali oyo bazui libatisi ya Molimo Mosantu.

²⁶¹ Etonga ya Aimee McPherson, mwasi yango asalaki nini? Azalaki liboso mo-Unitaire, nabanzi; nde abimaki pe akómaki na ba-Assemblée; na nsima, abimaki pe akómaki ebongiseli mosusu; awa, eumeli te, akotisaki mwa etonga moko, mwa eloko moko.

²⁶² Nazalaki na liyangani ya O.L. Jagers. Sikawa, biso nyonso toyebi O.L. Jagers. Tata na ye—na ye asungaki ete Conseil General ya ba-Assemblée de Dieu ébandisama. Sikawa, O.L. azali moto monene. Azali motei monene. Nalobaki na ye, eumeli te, nalobaki: “Ndeko Jagers, soki ngai nakokaki koteya lokola yo, nalingaki kosala ata liyangani moko te mpo na lobiko na nzoto.” Kasi azalaki na makila wana nyonso, pe vinyo, pe nyonso wana, ntango abandaki kuna, na ebandeli.

²⁶³ Bolimbisa ngai, soki nazali koyokisa bino mitema mpasi, bandeko, na likambo yango. Ngai—ngai...Ezali mabe te. Nzambe akoki kobimisa makila, kobimisa vinyo, to kobimisa mafuta, nyonso oyo Alingi, kasi yango elimbisaka masumu te. Te, misie. Te, misie. Te, ata moke te. “Makila na Yesu Klisto ekobungisa nguya na Yango mokolo moko te, kino ete Lingomba na Nzambe mobimba oyo esikolami ébikisama, mpo é sala lisusu masumu te.”

²⁶⁴ Nalobaki: “Ndeko Jagers?” Namemaki ye; nabengaki ye na telefone. Pe nazalaki elongo na Baklisto Bato na Mombongo. Pe nalobaki, nalobaki: “Ndeko O.L?”

²⁶⁵ Alobaki: “Yo ozali wapi kasi?” Nazalaki kuna, na mwa ndako ya bapaya ya ntalo moke. Pe alobaki: “Olingi koloba na ngai ete bango nde batii yo kuna?”

²⁶⁶ Nalobaki: “Yango nde mposa na ngai. Ntango nayaki epai na yo,” nalobaki, “osalaki nini? Otiaki ngai kuna, na Hotel Statler, pe esengelaki ete názala na suka. Bafandisaki ngai na mesa moko; nayebaki mbeli nini násalela te, to eloko mosusu te. Pe nazalaki te...Nakómaki kuna, nalataki kazaka te, balingaki bábimisa ngai.” Pe nalobaki: “Na—nayebi ndenge ya komikamba te.”

Alobaki: “Nakomema yo kuna, soki bakoki kosala yango te mpo bazali babola mpenza.”

²⁶⁷ Nalobaki: “Te, misie.” Nalobaki: “Eloko nalingi kosala ezali nde kolia mosuni ya ngombe elongo na yo, soki okolinga kofuta mpo na yango.”

Pe alobaki: “Nandimi.”

²⁶⁸ Bongo, tokendeki na esika moko, pe tofandaki. Nalobaki: “Ndeko Jagers, nasepelaka mpenza na...”

²⁶⁹ Pe azali moninga na ngai ya motema mpenza, ndeko ya motuya. Pe na—nazalaki na mwa buku na ye, pe ye...epai alobeli mwasi oyo autaki kokóma awa, kouta na mboka mopaya, oyo azalaki na makila na maboko na ye, pe nyonso wana. Bongo

nazalaki na yango wana. Pe mposa na ngai ezalaki ete awangana yango mbala moko, pe, nazalaki na yango mpenza na lokasa oyo ye—oyo ye akomaki, bomoni.

270 Nalobaki: “Namoni ete ozali kokende kaka liboso, ete obandi, ete okobandisa kolamuka monene.” Mpamba te, Bato na Mombongo nde babengaki ngai kuna, na ntembe te.

271 Emonani lokola ete bato bakoyeba. Soki Molimo Mosantu akoki komonisa makambo likolo na eteyelo, Akoki koyebisa ngai makambo oyo ezali kosalema na bisika mosusu te, bandeko? [Losambo balobi: “Amen.”—N.D.E.]

272 Nakoki koyebisa bino, liloba moko na moko, pe kotalisa yango na nzela na Ndeko Carlson, ná ndeko *oyo*. Nafandaki na na liyangani, lobi, pe naye bisaki na bandeko oyo makambo oyo elingaki kosalema awa na ntongo oyo. [Ndeko moko alobi: “Iyo, misie.”—N.D.E.] Ya solo. Solo mpenza. [“Amen.”] Bomoni? Mpamba te, Molimo Mosantu alamusaki ngai, pe alobaki: “Telema pembeni na lininisa.” Natalaki na lininisa, pe Alakisaki ngai likambo *oyo* mpenza. Nalobaki: “Sikawa, bandeko. . .” [Ndeko moko alobi: “Ya solo.”] Nalakisaki bino yango, ezali mpenza solo. Yango oyo! Bomoni?

Oh, basengelaki koyeba yango.

273 Awa, eumeli te, mobali moko atelemaki, awa na Chatauqua, pe alobaki: “Ndeko Branham azali mosakoli.” Ngai nalobaka te ete nazali mosakoli. Bomoni? Kasi alobaki: “Ndeko Branham azalaka mosakoli ntango azalaka na nse ya Molimo ya kososola makanisi, kasi,” alobaki, “oh, Malakisi na ye ezali mbondó. Bókébaka na Yango.” Namilobelaki, moto oyo atángá, áloba likambo ya boye?

274 *Mosakoli* elingi koloba nini? “Molimboli ya Liloba na lolenge ya Bonzambe.” “Liloba na Yawe eyaki epai na mosakoli,” bomoni. Kasi, kaka yango, ezali pe likambo ya koloba awa te.

275 Kasi, ata bongo, Ndeko Jagers. Pe nalobaki, alobaki, oh. . . Nalobaki: “Namonaki likambo ya mwasi wana, oyo azali na makila na loboko.”

276 “Oh,” alobaki, “Ndeko Branham, ezali likambo ya kokamwa oyo omóná naino te!”

277 Nalobaki: “Ndeko Jagers, ngai nalingi yo. Ya liboso, nalingi ete ótia loboko na ngai kati na oyo ya yo. Tóloba ete tozali bandeko.”

Alobaki: “Solo. Likambo nini?”

278 Nalobaki: “Yo ozali moko na batei ya nguya koleka oyo ngai nayebi. Ozali esalelo monene—monene ya Nzambe!”

279 Alobaki: “Matondi, Ndeko Branham. Ozali na komikitisa mingi.”

²⁸⁰ Nalobaki: “Nalobi bongo te mpo na komikitisa. Nalobi bongo mpo nandimi yango. Ozali mosali na Nzambe.” Kasi nalobaki: “Ndeko Jagers, soki o . . . O—okei mosika mingi; ozali na ndanga moko te oyo ekoki kondimisa makambo oyo ozali koloba. Ozali kotia moboko . . .”

²⁸¹ Pe yango nde kokoso ya bato mingi kati na bino, bato ya Assemblée de Dieu, ná bato mosusu, mpo na mayangani ya lobiko na nzoto. Nazali kopamela bino te. Makambo mingi ebengamaka . . . Pe Tommy, oyo, azali ndeko malamau, pe toyebi ndenge atelemi ngwi. Kasi makambo mingi mpenza, na ekólo, ebengamaka lobiko na nzoto uta na Nzambe, ezali likambo ya kokamwa te ete bóboya kosunga mayangani kati na engumba. Bazali koya kobenda bato mbongo, pe bakei. Pe bazali na eloko nini? Bapesaka bato eloko mosusu te, koleka oyo opesaka uta na etumbelo, uta na eteyelo na yo moko. Pe bolobi solo, bandeko. Nayebisi bino, bolobi solo. Kasi ezali lokola . . .

²⁸² Nazalaki kotanga lisolo ya Martin Luther. Elobami ete: “Ezalaki likambo ya kokamwa te ndenge Martin Luther atelemelaki lingomba Katoliko, pe alongaki yango.” Bosilá kotánga lisolo na ye. “Kasi ndenge Martin Luther amemamaki te na bilandá-landa nyonso oyo elandaki kolamuka na ye, yango nde ezalaki likambo ya kokamwa.”

²⁸³ Pe soki likambo ya kokamwa esalemi, nde bazángi kokatama ngenga balandaka, ndenge esalemaki na Ezipito. Pe ekótisaka ntango nyonso mobulu na mboka. Toyebaka yango, ntango tokómaka kuna. Kuna, Kóla atelemaki, pe Nzambe atindamaki kobebisa yango. Kasi, bandeko, nazali kopamela bino te.

²⁸⁴ Ndeko Jagers afandaki wana pe azalaki komeka koyebisa ngai ete Molimo Mosantu nde azalaki kosala yango. Pe alobaki . . . Na nsima, kati na zulunale na ye moko . . . Nalobaki: “Ndeko Jagers, sikawa,” nalobaki, “ngai nasúká na kelasi ya nsambo. Kasi yo ozali Docteur ya Likindo, pe otángá kelasi ya avoká. Okóli na lingomba ya kitoko, ya malamau, ba-Assemblée de Dieu. Tata na yo asungaki yo mpo na kotia moboko wana ya kondima. Kasi yo ozali kotangua na yango, etali yo.” Kasi nalobaki: “Moto nyonso oyo alingi kosala bongo, etali ye. Nakoki kotelemela yango te. Kasi soki ekómi likambo ya esalelo lokola yo, oyo okoki komema milimo nkoto na nkoto epai na Klisto, kotonga mosala na yo ya koteya likolo na kotúntuka.” Nalobaki: “Ndeko Jagers, soki otongi likonzi moko ndenge *wana*, soki ozali na eloko moko te mpo na kosunga yango, ekokweya nsima na mwa ntango. Pe osengeli kozala na Likomi mpo na makambo oyo ozali koloba.”

Alobaki: “Likomi ezali.”

Nalobaki: “Lakisa yango.”

²⁸⁵ Alobaki: “Ee, Ndeko Branham,” alobaki, “Molimo Mosantu moto azali kosala yango.”

286 Nalobaki: “Lakisa ngai Likomi oyo Elobi ete Molimo Mosantu ebimisaki makila na nzoto ya moto, pe bongo na bongo, ndenge wana. Lakisa yango; mafuta kobima na nzoto na bango. Olobaki: ‘Mafuta yango ezali mpo na lobiko na nzoto kouta na Nzambe.’ Pe olobaki: ‘Makila ya mwasi yango ezali lobiko ya mabota.’” Nalobaki: “Soki ezali bongo, boye likambo nini ekómeli Makila ya Yesu Klisto? Yango elongolaka. Pe nyonso oyo ekeseni na Yango, ezali motemeli. Etelemeli Yango.” Nalobaki: “Ekómi malakisi ya kotelemela Klisto.”

“Oh,” alobaki, “Ndeko Branham, mokolo moko okoyeba.”

287 Nalobaki: “Nabanzi ete nakoyeba bongo ata moke te. Sikawa, ndeko,” nalobaki, “ngai nalingi yo, pe ozali ndeko na ngai.” Pe nalobaki: “Ndeko Jagers, okomata na étápe moko, oyo nsima na mwa ntango, okokoka lisusu kozonga nsima te. Zonga awa na lingomba na yo, zonga pe kangama na Nsango Malamu.” Pe nalobaki: “Kotonga yango likolo na kotúntuka te.” Nalobaki: “Yango. . .”

288 Sikawa azali na, akómi kobatisa mpo na Bomoi ya Seko, boyebi, “Mbala na mbala ozali kobatisa, ozali kozonga elenge mwasi to mobali. Sikawa, likambo yango. . . Okokufa (soki moke) te.” Boye, yango, wana, akómi na suka ya etape sikawa; ná “ba-mbuma ya nkisi ya vitamine wana, oyo euti na Mer Morte.” Bomoni? Kasi yango mpenza, ndeko, babandaka na mwa kotúntuka wana.

289 Pe bino mibali oyo bozali awa, oyo bozali na mangomba yango, bozali kotika likambo ya ndenge wana ékota na engumba oyo, pe, boyebi, Zabolo azali na mayele mabe, pe ye—ye awelaka kozua makambo ya ndenge wana. Akosala ete bato basepela na yango. Pe a—akosala ete bato bamemama na likambo yango, pe akokotisa mobulu kati na lingomba, ná makambo mosusu. Kasi ezali bongo te.

290 Sikawa, botala. Ata soki ozali na elonga ndenge nini, tala likambo oyo tokwei na yango pe tozangi yango, bandeko. Sikawa, nalingi nasilisa, na maloba oyo. Ata soki nazali na elonga ndenge nini, natongami na Makomi ndenge nini, pe nayebi makambo ya Biblia ya Nzambe ndenge nini; soki nazali na Molimo ya Nzambe te, oyo ya bolingo, na motema na ngai, mpo na bato nyonso pe biloko nyonso, wana nakwei na mobimba.

291 Sikawa, Polo alobaki, na Bakolinti ya Liboso 13: “Ata nazali na boyebi, bomoni, pe nasosoli mabombami nyonso ya Nzambe, bomoni; na nyonso, malamu; kasi nazangi bolingo, nazali mpamba. Ata pe nalobaka minoko ya bato pe ya banje,” ezali oyo osololaka na yango na Nzambe, pe ntango nyonso, oyo ekoki kolimbolama te. “Ata nazali koloba minoko, minoko mpenza ya bato pe ya banje, kasi nazangi bolingo, kolinga, nakozua litomba moko te.” Boye, soki nayebi mabombami

nyonso ya Nzambe, pe nakoki kofungola yango pe—pe kosala ete nyonso etambola na molongo, kasi nazangi bolingo, ntina na yango nini? Pe soki na . . .

²⁹² Yesu alobaki: “Na yango bato nyonso bakoyeba ete bozali bayekoli na Ngai, soki bozali na . . .” soki ba-Assemblée balingi ba-Unitaire, pe ba-Unitaire balingi ba-Assemblée, “soki bolingani, kati na bino,” bozala na elonga to na libunga. Soki likambo oyo ozali kolanda ezali mabe, mposa pe ezali mabe, kutu, na ntango wana ozali mabe banda na ebandeli. Boye te? [Losambo balobi: “Amen.”—N.D.E.] Bomoni, “Ata nazali koloba na minoko ya bato pe ya banje, kasi nazangi bolingo, nazali naino mpamba.” Mpamba te, Nzambe azali bolingo. Toyebi yango.

²⁹³ Pe ngai nandimaka minoko na sika. Nzoka nde, moto moko alobaki: “Ndeko Branham andimaka ndangá ya liboso te.” Malamu násembola likambo yango elongo na bino sikawa. Bomoni? Malamu náyebisa bino.

²⁹⁴ Nandimaka ete ntango moto ayambi Klisto, azuaka eteni ya Molimo Mosantu. Mpamba te, Yesu alobaki, na Matai mo—mokapo ya 12, ya mokapo ya 5 pe ntuku mibale na- . . . nzela ya 24, Alobaki. Te, nabanzi ezali Yoane 5:24. Alobaki: “Ye oyo akoyoka Maloba na Ngai, pe akondima Ye oyo atindi Ngai, azali na Bomoi ya Seko.” Nzoka nde, lolenge ya Bomoi na Seko ezali bobele moko. “Pe akokóma na esambiseli te; kasi asili kolongwa na kufa pe koi ngela na Bomoi.”

²⁹⁵ Sikawa, nandimaka ete moto moko te akoki komibenga na mosala; Nzambe nde asengeli kobenga ye. Pe soki Nzambe abengi ye kati na solo . . . Pe bato mingi, toyebi, bandeko, bamipesa mosala pe bakanisi ete Nzambe abéngá bango, kasi bomoi na bango lobi-lobi . . . ekoyebana, ekomonana polele. Kasi soki Nzambe abengi yo, ee, ozali, okozala wana, pe okotikala wana, bomoni, boyebi. Na bongo soki . . . Sikawa, oyo wana ezali malakisi ya ba-Batiste te. Boyebi yango, bomoni.

²⁹⁶ Kasi, nandimaka te likambo ya kopesana mbote ya maboko mpo moto ázua kimia ya Seko, ná makambo nyonso wana. Na—nandimaka yango te, ata moke te. Soki balingi kondima yango, ee, malamumu. Nabenga bango kaka bandeko na ngai.

²⁹⁷ Na ntongo oyo, soki nakokaki kosenga eteni ya gató (ekómi penepene ngonga ya bilei ya moi), nakoki kosepela na oyo batiá seríze, pe yo okoki kozua oyo batia póme, kasi biso mibale tozali kolia gató. Bomoni? Boye, bokeseni ezali te . . . lokola tozali kolia gató.

²⁹⁸ Tondimaka pe ndenge wana. Soki olingi kozala moto ya Unitaire, zalá moto ya Unitaire; soki olingi kozala moto ya Assemblée de Dieu, zalá moto ya Assemblée de Dieu. Soki olingi kozala oyo ozali, Batiste, Presbiterien, zála Moklisto kati na yango. Bomoni?

299 Pe—pe lukaluka yango yo moko, kasi bowelana kati na bino te. Mpamba te, makambo mike-mike oyo, nyonso esimbanaka malamau kati na yango. Ya solo. Nyonso esimbanaka malamau pe ekutanaka na esika moko wana.

300 Pe—pe ata soki tosali nini, bikamwiseli boni tokoki kosala, ngomba boni tokoki kolongola, to eloko nini; soki tokómi naino na mosanda ya kolinga te, oyo ya lokuta te, kasi tolingani kati na biso. Soki tolingi ndeko nyonso, ata soki asambelaka wapi, tolingi ye; kosuka na koloba te ete olingi ye, mpo toyebi ete basambeli bakómi kokanisa bongo, ekómi: “Totindami kosala bongo.” Kasi, mpo ete tozali kosala yango, tolingani; na bongo, na motema molai, komiyikana mpiko.

301 Pe nandimaka, na Bakolose 3, pene na 9, na esika moko wana . . . Nakoki, na—na . . . Ntango mosusu nabosani nzela ya Makomi, kasi Elobi boye. Wana tokómi Baklisto, tosengeli kozala na zuwa te. Bomoni? Tokoki kozala na kondima te soki tozali komeka kopesana limemia pe kotosana kati na biso. Bomoni, tokoki te; tokoki kozala na kondima te. Tosengeli nde kotosa Nzambe, bomoni, kotosa Ye. Kondimela bandeko na ngai, na ntembe te, ezali bolingo; kasi limemia pe lokumu ézóngaka nde epai na Nzambe! Na oyo etali . . . Kasi bózalaka na elikia pe bótiaka motema bamoko epai na bamosusu. “Kasi bolobanaka lokuta te.” Bomoni? “Bolobanaka lokuta te.” Soki na ntongo oyo nalobi na yo: “Nalingi yo,” esengeli kouta na motema. Soki te, nazali moto ya bilongi mibale. Ya solo.

302 Sikawa, bandeko, kaka na likanisi yango . . . Sikawa, Ndeko Tommy, nabanzi ete naumeli mingi te, awa. Ngai . . . Ndeko Tommy azali na likambo ya koloba na mwa ntango moke. Kasi nakoki koloba boye, ntango nayaki epai na bino . . .

303 Ngai nandimaka boye. Nandimaka ete Nzambe Tata na biso azipaki ngondo moko na nkombo Malia na elili na Ye, pe Akelaki momboto ya Makila kati na ye, yango nde esalaki Yesu Klisto, oyo azalaki Mwana na Nzambe, mongombo oyo Nzambe amibombaki kati na yango, na mosuni, pe amimonisaki elongo na biso. “Nzambe azalaki kati na Klisto, kozongisa bato ya mokili na bondeko epai na Ye moko.” Nandimaka ete momboto ya Makila yango epasukaki na Gologota, mpo na kolimbisama ya masumu na biso. Pe Molimo abimaki kati na Ye pe azongaki likolo na Lingomba, mpo ete, Klisto, Molimo Mosantu; Klisto, Logos, akómaki kati na biso na ntango yango, Molimo Mosantu, na nzela na libatisi. Kokómisa biso . . . Klisto Amikabolaki, Apesaki Bomoi na Ye epai na moko moko na biso, mpo biso, lokola etonga na bato, tókóma Lingomba na Nzambe. Pe eumeli te . . .

304 Nazaláká kotambola na mpunda. Boyebi yango. Tata na ngai azalaki motambwisi mpunda, ya solosolo. Nazalaki kotambola na mpunda. Tozaláká kokamba bitonga ya—ya . . . na Lobwaku

ya Arapaho, to nalingaki koloba, na Ebale ya Troublesome, na ngambo ya Bilanga ya Arapaho. Bato ya Lisanga ya Hereford nde baleisaka bibwele na bango na lobwaku yango. Pe na lobwaku yango, bankolo bilanga, ba—bazali na matiti mingi oyo bango moko balonaka. Pe soki elanga moko ebimisi matiti mingi, penepene tone mobimba, okoki komema ngombe na—na matiti yango, kuna na nse ya Parc Estes, pe okoki komema ngombe na ma- . . . Nakendaka kosala bokila mingi kuna. Pe nasalaki mosala ya kobokola ngombe kuna mobu moko. Nakendaka kuna kino lelo, na eleko Molunge ebandaka pe na eleko Mpio ebandaka, soki nazali na mosala te pe soki nakoki, nasangisaka bibwele, kaka mpo názala kuna, mpo nasepelaka kotambola na mpunda. Pe natambolaka bipai na bipai kati na ela- . . . lobwaku yango, ndambo na babokoli ngombe bazali na ndingisa ya kokota kuna, pe koleisa bibwele na bango. Pe na eleko Molunge ebandaka, mbala mingi, nasila kosunga bango mpo na kosangisa bibwele na bango pe kokamba bango kuna.

³⁰⁵ Pe batongá lopango ya bibwele, mpo bázonga na mabele ya bato te, ntango bazali koleka na bilanga ya matiti. Kino. . . Pe mobateli bibwele atelemi wana, azali kotanga bibwele yango ntango azali kokota, ntango bazali kokota. Pe nafándá, mikolo ebele, ngonga moko nsima na mosusu; nazalaki kotala ndenge bibwele ya M. Grimes bazalaki kokota, ye azalaki na ba-Diamond Bar; oyo ya biso bazalaki ba-Turkey Track; pe na nse na biso, bazalaki na—na ba-Tripod; ná baoyo ya Jeffrey, pe bongo na bongo. Na nsima, soki natii lokolo likolo na libaya ya ebonga, ndenge mingi kati na bino boyebi, nazalaki kofanda wana mpo na kotala mobateli bibwele yango, ndenge atelemi wana, ntango azalaki kotanga bibwele yango.

³⁰⁶ Namonaki eloko moko. Azalaki kotia bokebi mingi te na elembo na loposo na ye. Kasi eloko oyo ye azalaki koluka mpenza ezali bobele moko, ezali nde elembo ya makila. Esengelaki kozala ya libota ya Herford, soki te ekoki pe kokota na lopango wana te, kasi elembo na loposo ezalaki kosala bokeseni mpenza te.

³⁰⁷ Nakanisi ekozala pe bongo na Esambiseli. Akotala bilembo na loposo na biso te, kasi Akoluka nde elembo ya Makila.

³⁰⁸ Nasálá mabunga, bandeko, pe nasálá makambo mingi ya mabe. Pe soki mokolo moko kati na mobembo oyo natéyá, to boyóká likambo moko oyo nalobélá to nalóbá, oyo ekoki kobetisa libaku na lolenge moko boye, to soki nalobi likambo moko na ntongo oyo, oyo ekoki kobetisa libaku, nasengi yo, lokola ndeko mobali to ndeko mwasi Moklisto, limbisa ngai. Nakani yango te. Nafungoleli bino kaka motema, mpo tóyeba.

³⁰⁹ Soki mosala ya kobatisa ezali, bino bandeko bósala yango, bino moko, bomoni. Ezali, ngai na—nakosala yango te. Soki natindami kosala yango, nalingaki kobatisa bato ndenge wana,

moto na lolenge wana. Pe bino nyonso mibale bokoki kondima yango, bomoni. Boye, bokoki kozua moto yango, bazui libatisi na Nkombo ya Tata, Mwana, pe Molimo Mosantu, bazui pe libatisi na Nkombo na Nkolo Yesu Klisto. Boye soki mokolo moko nabatisi moto . . . kasi nasali yango naino te. Nabatisaka bobele na losambo na ngai moko, pe kaka bato ya kuna. Pe bato ya losambo na ngai bazuaka libatisi nde bongo. Pe soki obwaki miso na nsima, yango nde lolenge ba-Missionnaire ya kala bazalaki kosala, lolenge ya ba-Missionnaire Batiste ya kala. Pe sikawa, soki . . . Ezali bongo.

310 Ngai nandimaka lobiko na nzoto kouta na Nzambe. Nandimaka libatisi ya Molimo Mosantu. Nandimaka ete—ete Molimo Mosantu alobaka minoko na sika. Nandimaka makabo nyonso oyo Nzambe apésá na Lingomba na Ye. Nandimaka yango, na mobimba. Kasi nandimaka . . .

311 Nandimaka te ba-lobiko na nzoto ya káfúkafu oyo ya mikolo oyo. Nalingi nde nálobela likambo moko awa. Eleki mwa ntango, ndeko mobali moko . . . Ezali Ndeko na ngai ya motuya Tommy Hicks te, oyo mpo na ngai azali mpenza mosali ya Klisto. Ezali moto mosusu na ekólo mosusu, pe na ekólo yango, ezalaki na . . . Bazalaki ntango nyonso koloba: “Mobikisi ya káfúkafu ya Nzambe! Mobikisi ya káfúkafu,” boyebi, ndenge wana.

312 Pe nayambaki mokanda moko nsima na moto yango ko . . . ya lingomba ya ba-Lutherien. Pe seketéle na ngai oyo ayebi ete tozali na yango kati na mikanda na biso. Nakotanga nkombo ya mobali yango te, mpo Baklisto basalaka bongo te. Atako nandimaka lokola mobali yango te, kasi ezali mpenza na molongo. Nalingi ye. Azali ndeko na ngai.

313 Kasi ekómaki na esika moko, oyo basengeli kaka kozala na eloko moko ya káfúkafu, to ya komemama, to eloko mosusu ya ndenge wana, bomoni. Pe, oyo wana, ezali na ntina moko te, bomoni. Ndeko . . . “Ngalasisi ya nzoto esalaka makambo moke mpenza.”

314 Na bongo motei oyo ya Lutherien ayanolaki motei yango na mo—mo—mokanda. Pe alobaki: “Bino ba-Evangeliste ya Amerika oyo boyaka awa,” alobaki, “ná makambo na bino ya lobiko na nzoto ya kokamwa, mpo na bato nyonso!”

315 Sikawa emonani lokola nazali komipesa longonya, kasi Nzambe ayebi ete nazali na likanisi wana te. “Kasi,” alobaki, “ntango—ntango mwana oyo Deborah Stadskev akufaki, bebé wana, pe mama na ye atelemaki wana, mokolo wana, na India- . . . na Californie, esika bebé yango akufaki, pe nzoto na ye ekómaki mpio. Pe amonaki . . . atiaki bebé yango na maboko ya Ndeko Branham, pe ye atelemaki wana pe abondelaki mpo na bebé yango. Pe bebé yango akómaki koganga pe koningana; pe azongiselaki ye bebé yango.”

³¹⁶ Ayebaki pe likambo oyo ya Mexique. Oyo, tokoki kondimela Bato na Mombongo ya Litondi ya Nsango Malamu. Esengeli kozala eloko oyo etatolami na monganga. Ntango bebé oyo ya Mexique akufaki na ntongo wana, na ngonga ya libwa, pe ekómaki ngonga ya zomi na moko na butu. Monganga akomaki mokanda na ye ya litatoli. Ndeko Espinoza, oyo mingi kati na bino, bandeko ya ba-Assemblée de Dieu boyebi, ye moto akendeki kozua mokanda yango epai na monganga, ete akufaki.

³¹⁷ Pe namonaki emononeli, likolo na ebele na bato; ntango ba-Katoliko nkoto ntuku mibale bayaki epai na Klisto, na engumba ya Mexico. Nalobaki: “Bozua yango te. Nayebi te, bebé yango. . . Nauti komona emononeli awa.”

³¹⁸ Pe Billy azalaki wana, azalaki komeka, ná basungi ntuku misato to ntuku minei, bazalaki kokoka te kopekisa mwasi wana kokota na molongo ya mabondeli, ná bebé yango. Azalaki kokota na kati na makolo na bango, pe nyonso. Bongo, na suka, natindaki Ndeko Jack Moore. Nalobaki: “Kende kondela mpo na mwana wana.”

³¹⁹ Natali boye, namoni bebé moko ya Mexique azali koseka. Nalobaki: “Bozela. Boya na ye awa.” Bomoni? Pe ntango natiaki maboko likolo ya bulangíti wana. . . Mbula monene ebetaki, moi mobimba. Pe bakómaki wana na ntongo ntongo ya mokolo yango, pe ekómaki pene ngonga ya zomi na moko na butu. Natielaki bebé yango maboko. Akómaki koningana pe kolobaloba. Pe bango bakómaki koganga.

³²⁰ Bongo, na nsima bakitaki na ye pe bakendeki kozua mokanda ya litatoli. Bakendeki epai na monganga, pe monganga alobaki: “Natatolaki ete bebé oyo akufaki, na ntongo ya lelo, na ngonga ya libwa. Akufaki na malali ya mpanzi.” Bomoni? Na bongo makambo yango ezali—ezali—ezali solo. Etatolami na mikanda. Esengeli kozala bongo.

³²¹ Tosengeli ntango nyonso kozala na bosembo pe na solo na makambo nyonso. Kokómisa yango te. . . Tika yango ézala kaka oyo yango ezali. Tika yango. . . Nzambe azali na bosenga ya lisungi na likambo ata moko te. Bomoni, Ye—Ye—Ye azali Nzambe.

³²² Bongo, sikawa alobaki boye: “Kasi ntango mama yango abengaki Ndeko Branham na Amerika, wana azalaki kolela na telefone, alobaki na ye: ‘Yaka kosekwisa bebé na ngai!’ Pe guvenemá ya Etats Unis. . .”

³²³ Mobali na ye azali motei na mampinga. Pe bino nyonso boyebi Julius, mingi kati na bino bayebi ye; akomaki buku na ngai ya: *Mosakoli Akei Kotala Afrika*.

³²⁴ Pe mama yango, moto ya Norvege, azalaki koganga, na makasi na ye nyonso, koloba: “Ndeko Branham, nazalaki wana ntango bebé yango asekwaki!” Alobaki: “Tondimi ete yo ozali mosali na. . . ya Klisto.” Alobaki: “Yaka, kotiela bebé na ngai

maboko, pe akobika.” Autaki kokufa, kala mingi te, na malali ya mpanzi; abelaki pene na ngonga minei, to mitano.

³²⁵ Pe mibali yango bazalaki wana, bazalaki kolela pe koganga, kopumbwa-pumbwa, koloba: “Nzambe akosekwisa ye! Nzambe akosekwisa ye!” Pe bazalaki koloba . . .

³²⁶ Mpo na yango, Kompani ya Amerika ya Mpé- . . . to, Kompani ya Amerika ya Mpépo te. Basodá ya Etats Unis balingaki komema ngai kuna na mpépo ya moke, pe kozongisa ngai, na mokolo moko. Bomoni?

³²⁷ Pe nalobaki: “Liboso ete naya, botika ngai naluka mokano na Nkolo.” Bongo nabondelaki, mikolo mibale. Pe monganga yango azalaki na boboto mingi, atikaki ete bebé yango álala wana.

³²⁸ Bongo, na ntongo moko, nalamukaki pe nazalaki kokende na makusa. Natalaki; liboso na ngai, Pole moko ezalaki wana, ekokanaki moke na mwinda oyo kuna, ezalaki kozunguluka, elobaki: “Kosimba yango te. Kopamela yango te. Ezali loboko ya Nkolo.”

³²⁹ Nazongaki na mbangu pe nabengaki na ekólo yango, nabengaki pe nalobaki: “Na—nakoki koya te.”

³³⁰ Pe motei oyo ya ba-Lutherien alobaki: “Mpo na nini bozelaka te kino ete bózua mokano mpenza kouta na Nzambe, lokola Ndeko Branham, na ntango wana boyebi oyo bozali koloba!”

³³¹ Sikawa, ezali bongo, bandeko, soki tokokaki bebele kotika kozua mikano ya nokinoki; pe kozela mpo na koyeba malamumu, mokano mpenza kouta na Nzambe.

³³² Pe nyonso wana, lobiko na nzoto ya basumuki oyo bayebi Nzambe ata moke te. Ngai nandimaka ete lobiko na nzoto kouta na Nzambe etongami likolo na mobeko moko, ete osengeli liboso koya epai na Nzambe, kopesa Ye motema na yo, pe kosukola bomoi na bino na Makila na Yesu Klisto, nde Nzambe akobanda kosala na yo pe akobikisa yo. Kaka ndenge ndeko mobali wana alobaki, mpo na mwasi oyo ye abondelaki mpo na ye kuna, mosantu ya Nzambe, bomoni.

³³³ Na bomoi na ngai, nasálá mabunga ebele. Nasálá makambo mingi oyo ezali malamumu te. Mbala mosusu, soki nabiki lisusu ntango molai, nakosala mosusu ebele. Mbala mosusu makambo mosusu kati na yango ekozala mabanga ya libaku na nzela na bino. Nazali kolikia ete bokolimbisa ngai.

³³⁴ Nazalaki kotanga lisolo ya Abalayama, makambo oyo azangaki kolonga. Ndenge ye, oh, makambo oyo asalaki; atiaki ntembe na Nzambe; pe akosaki na likambo ya mwasi na ye; pe nyonso wana. Kasi ntango Nzambe akomaki lisolo na ye, na Baloma 4, elobeli mabunga na ye soki moke te, kasi elobi: “Abalayama atengatengaki te”, na kozanga kondima . . . na Nzambe, “kasi akómaki makasi.” Mabunga na ye nyonso babosanaki yango nye, ntango Nzambe akomaki lisolo ya bomoi

na ye. Balobeli ata makambo oyo azangaki kolonga te. Balobeli mabunga na ye te.

³³⁵ Pe, bandeko, nazali kolikia ete, ntango bakotánga lisolo na ngai Mokolo wana, Akolongola pe oyo ya ngai, pe Akokanisa yango te. Nazali kolikia ete ekozala pe bongo mpo na bino. Nzambe ápambola bino.

³³⁶ [Ndeko Tommy Hicks abakisi maloba, na nsima abondeli. Losambo basanzoli Nkolo, na nsima bayembi *Nalingi Ye*. Bandeko mibali bayambani, pe bandeko basi bayambani. Nsima na miniti mwambe, Ndeko Branham azongi na mikró—N.D.E.]

³³⁷ Soki nakoki komona likambo ya boye kosalema na mokili mobimba, nakoloba: “Nkolo, tika moombo na Yo ákende na kimia!”



BONZAMBE ELIMBOLAMI LIN61-0425B
(The Godhead Explained)

Liteya oyo ya Ndeko William Marrion Branham, eteyamaki liboso na Ngelesa mokolo mwa mibale na ntongo, mokolo mwa 25, sanza ya minei, na mobu 1961, na Holiday Inn, Chicago, Illinois, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org